

Paulus mo surat Romak de Kristen zi hip

[(1-7) 7a] Suratna an tingare Romak de Kristen zi hip. Alap mes emsa kwasang gwibiridaka, dekam zep hen emsa kwang guludaka- dekam de zere mo irik ginnik biti gwen hapye.

¹ Kristus Yesus mo nganak de syal gwe-gwen zini Paulus onakon. Asa hen Alap zao dep kwang taka, dekam zep hen asa dam tasiki-zere onakore ol dawemsa dikim gol halada gwen hapye.

² Ol dawemna an Alap mes orep zere mo olsa de ayang gul gwen zini anakan gu-gubirida gweka, "Ee asa lamkam ol dawemna ebe mae hap golzim." Zen dekam zep kirekam Alap mo epbaolak ale nuk. ³⁻⁴ Ol dawemna an, zen Alap zere mo Tanena, neno mae mo Teipsinni Kristus Yesus hup dena. Auhu-kamanak de jaha gweblan nakon, Desa man enlala neblak, "Daud Bak mo auyan-aza nakorena." Hwena Alap kim zere mo ssonkam tin nikon ngaya taka, Zen dekam zep anakan tingare zi hip zertreizimki, "An ere mo Tane- ere han de enho apde nenna."

⁵ Hendep Alap hen Kristus onakon asa kwasang gweblaka, zep abe hap sosonna golblaka hen asa dam tasiki- dekam de Kristus zere hap denaka Yahudi srēm zi sin dep gol halada gwen hap denaye, zen dikim hen Yesussu taibliblan hap hen blikip gwesiblin hap. ⁶ Zep Romak de zini

emsa hen Alap man kwang guluda'ara- dekam de Kristus mo bi gwibinnik bitī gwen hap.

⁷ Dawem! Zen in zebē ep ale gulzim'in. Nēre mae mo Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zēre nik mo taha terenak esa lowehe gwer.

Mae hap de ol: Paulus man tangan dwam gwe'anka Romak de Kristen zisi de amjanbin hip.

⁸ Zep nonol tanganna, ēe Kristus Yesus onakon Bian Alap hap dawemsaē gol gwebla'an, sap Romak de zini, eno mae mo Yesussu de taibliblanna mes tūngare okamanak de ē-ē san nol haladak.

⁹ Zep Alapsa de gu sone gweblankam ēe homē emsa eititi gwibirida gwenan. Alap men Zēbonē tūngare enho naban syal gwe-gwe'an, zēre mo Tane hap de olsa de gol halada gwenkam, dikire Zen asa hla tak- ēe de ahap gwenkamye. ¹⁰ Zen in zebē etan-etankam Alapsa anakan abe ta gwenan, "Bian, Em wēhē angkam orana abe hap kles tyasibli'anka?- ēe dikim Romak de Kristen zisi amjanbiridan hapye." ¹¹ Ēe orep mesē sap dwam gwe-gwek- eban mae de golēgaing gwen hapye, dekam de Alap mo Enho nakore sosonkam eno mae mo eisi tatete gulzimdin hip. ¹² Zen dekam esa apdekam nēnaka tatete la gwibir, sap nen mese apdekam Yesussu laibliblak.

¹³ Zep aya-wal oso-wal, ēe mesē sap beyakam kalang gwe-gwek- emsa de amjanbiridan hapye. Hwēna ama sap akasik gwek. Sap ēe ama enlala gwe-gwek- ebon mae onak de hen ano syal ei lwan hap, men kirekam hen aha Yahudi srēm zi

mo langnak de ë-ënak lwakke. ¹⁴ Sap abe hap mes Alap syala wei yul soneblaka- tîngare zisi de Yesus hup de olkam tonbirida gwen hap, sap nëno mae mo Yunani olsa de tame gun wenya, hen desa de tame gun srëm wenya, sap sekola ha gwen wenya, hen sap sekola gwen srëm wenya. ¹⁵ Sap Alap kirekam de syalsa abe hap wei yul soneblaka, ëe in zebë tangan dwam gwe-gwe'an-ol dawemna insa de Romak de zini emsa hen tonbirida gwen hap.

Mae hap de ol: Yesus hup de ol dawemna an, Alap mo sosonna zëwe- zisi dikim ngaya tabin hip denaye.

¹⁶ Sap ëe homë saher gwe'an- zisi de Yesus hup de ola inkam tonbirida gwen hapye. Sap nen men zene ol dawemna insa laïbli'ın, nëno mae mo ëngaya gwen hap de sosonna zëwe lwa'an-nonol tangan Yahudi zini abe mae hap dena, hen sap tîngare Yahudi srëm zi hip dena. ¹⁷ Sap ol dawemna in dekam Alap zi hip goltreizim'ira, "A kirekam esa ano nwenak ëdakastil." Sap zëre mo nwenak de ëdakastin hip dena, zen diki Kristussu de taïbli'ın en nakon nëbe mae hap hata gwizimnin. Aha orana hom tangan. Zen man dakastin- men kirekam Alap mo olak lwakye,

"Men zen ëre mo nwenak ëdakastin, zen kitak Asa de taïbli'ın en nakon."*

Mae hap de ol: Alap kire karek-karek hap zini jal gwibirida gwenda.

* **1:17** 1:17 Hab. 2:4

¹⁸ Alap mes ngatan zi mo lang nakon zère mo jala goltrei gwizimki- men zen Zënaka eititi në gweblananke, zèbe mae hap. Sap zère mae mo kirekam-kirekam karek-karekna, zen dekam zèn eiwa dena ber-ber nul gwenan, zep hëndep Alapsa tame da srëm gwe-gwenan. ¹⁹ Sap Alapsa de tame tan hap dena mes tangan dam gwesik, sap Zen mes nëno mae mo enhonak Zënaka de tame tan hap dena ing ta soneka. ²⁰ Sap Alap kim okamana ansa yang gulsuku, Zënaka de tame tan hap dena mes zèwe anakan tame nul gwek, “Alapsa bëjen nwekam hla tan, hwëna Zen hëndep denaban de sason tangan Zini Zen. Hen Alap Zen zi mo kim hom.” Zen in zep, zini nen bëjen nen anakan ëgun, “Èe homë Alapsa tame tak.” ²¹ Zep zini mes sap Alapsa tame dak, hwëna hom blikip neisik gweblanan, hen dawemna hom nol gweblanan. Hwëna zen asyas makan enlala në gweblanan, zep hëndep enho nakon ëkawesik. ²² Zen man zënaka tim di gwibirin, “Èe an enlala blala.” Hwëna sap diki enlala joblo-topna. ²³ Zen zep hëndep de gwë gwen Teipsin tangan Zini Alapsa hom boklena kom da gweblanan. Zen hwëna yang tabin alap-alapsa boklena kom dabirida gwenan- zi nwe-masekam de wanya, mawa mo nwe-masekam de wanya, hen sapi mo nwe-masekam de wanya, hen sap wanya mae mo nwe-masekam de wanya. ²⁴ Zen zep Alap nwe enkam kara ta gwibirida, “Dikire zère mae mo hole-hle san ang tak.” Zen zep ëkahalo gwe-gwenkam zère mae mo timni kun da gwibirin hen zënaka saherak kang nul gwenan. ²⁵ Zen dekam zep eiwa de Alapsa hli da

gwenan- dekam de boton san ang ta gwen hap. Hwëna yang tabin kire-kire hap zep boklena kom da gwizimnin, hen zëbe mae hap de syalsa nol gwenan. Hwëna sap diki tangan okamana ansa Zen yang gulsuku, Desa en emaka boklena kom la gweblanan. Dikire hëndep denaban Zëna en naka boltere da gwek. In eiwa tangan.

²⁶ Zen zep Alap nwe enkam kara ta gwibirida, “Dikire zëre mae mo dwam-dwam san ang tak-saherak dekakim zënaka kang nul gwek.” In zep we walya zi niban de swi ën hap baes ta gwenan- men kirekam sap diki Alap gubiridakaye. Hwëna we wal bose zeban de swi ën hap ëhole-hle gwe-gwenan. ²⁷ Zep zini hen kirekam. Zen hen wenyä ban de swi ën hap man baes ta gwenan- men kirekam sap Alap gubiridakaye. Zen hwëna zi bose zeban de swi ën hap ëhole-hle gwe-gwenan. Zen dekam zep zënaka saherak kang nul gwenan. Zen dekon Alap mo jala hla nul gwenan- zëre mae mo karek gol gwen jam enkamye.

²⁸ Zep zini anakan de ëenlala gwenna man baes tak, “Anik Alapsa tame tak.” Alap hen zep nwe enkam kara ta gwibirki, “Dikire enlala kawesinnik lowehe gwek.” Zen zep hëndep Alap mo dwam gwibin srëm san karek-karek enna syal nei gwibirin. ²⁹ Zen in zep zëno mae mo enhona tingare karek-kareksa de gon hap de enlalakam beya gweka- men kiye,
totore swi hap dena,
te-ala beya gwen hap dena,
zi bosyansa de husus gweblan hap dena,

hen aha zi mo kire-kire dawemsa de dwam
 gwibin hip dena,
 wal bose zemka de tan hap dena,
 ëdarak gwen hap dena,
 hen wal bose zemka de lwa tasın hip dena,
 hen taıl gik gweblan hap dena,
 hen ahasa de tonsubirida gwen hap dena.

³⁰ Hen ahakore karek-karekna mensa nulin ha-
 lasen gwenan men kiye,
 Alapsa de husus gweblan,
 wal bose zemka de lamang tan,
 zënaka de boltere tan,
 hen zëna-zëna gwen,
 hen bolte-bolte gwen.

Zen hen mes ëtewesik banakare karek ësesa de
 enlala gwibinni,
 hen an-bi zemka de betek gwizimdinni tawa
 naka hom.

³¹ Zep hëndep enlalana ëjoblo-top gwek.
 Kire zisi bëjen taıblıbiridan,
 hen kire zi nik kwasang enlalana hom.
 Zen jal enlala enkam lowehe gwenan.

³² Zen sap mes anakan tame nuk, “Alap kirekam
 de karek-karek syal gwe-gwibin zini sa kareknak
 kang gulu.” Sap eiwa kirekam, hwëna zëna
 mwin-mwankam kire karekna syal nei gwibirin.
 Hen karek gol gwen bose zemka, zen man
 anakan titi da gwibirin, “Sap esa kirekam ol tine
 gwer.”

2

*Mae hap de ol: Nen bap nen ëtim gul gwen,
 “Alap molya nësa klis gulku.”*

1 Zen in zep, aya-wal oso-wal, em bëjen em anakan ëgun, “Ëe homë anakan tame uk, ‘Kirekam de syal gwibinni, zen kareknak tï’in.’ ” Sap em ema aha zisi enbirida gwenan, “Kirekam de kareksa gon zini, nen emaka karek la'an.” Hwëna em de hen kire kareksa gonkam, dekam em mese Alap mo nwenak enaka kareknak de drënen hap zergunda. Sap ena hen kirena, hwëna aha mo karek ensae hlaul gwizim'ira.

2 Zep ena hen mese tame uk, “Alap de kire zisi karek tabin hip man tangan dakastï'in.”

3 Hwëna em de hen zëno mae mo kim kirekam de kareksa gonkam, em san ema ëkil gi'in?– “Alap aha zi ensa sa kire hap karek tabiri. Asa molya.”

4 Em san ema hen Alapsa asyas makan kil li gwe'an?– “Alap man sërkam nësa kwasang gwibirida gwenda, hen Zen holokam nëno mae mo karek-karekna nwe enkam nëp kara gul gwizimnira, zep ëe sap asa karekna ol tine gwer.” Hwëna Zen mae hap holokam emsa kwasang gwibirida gwenda: Emsa dikim halen ora san dam tasik gwibin hip.

5 Hwëna em in nol drak-drakna hen ëhalen hap ema baes ta'an! Em in zebe ere mae hap de jala mam ulsuk gwenan. Zep aumwa hap de klis gunnuk, emsa tangan sa sërkam karek tabiri, sap Zen enlala dam-dam enkam sa tïngan nësa klis gulu.

6 Sap zen kirekam Alap mo ola ban dakastï'in– men zen anakan lwakye,

“Alap tïngare zi hip zëre mae mo syal ei jam enkam sa golzimdi– sap dawemsa de gol gwen zi hip dena, hen kareksa de gol gwen zi hip

denaye.”*

⁷ Dekam dawemsa de syal gwibinnik men zen tatetekam anakare enlala naban ëzauk gwenan, “Ëe akakim hëndep denaban zëre mo ngatannak bose dawem naban gwë gwëk,” zëbe mae hap hëndep de ëngaya gwen hap denaka sa golzimdi.

⁸ Hwëna men zen zëre mae mo tim enna ngalap nei gwibirin, hen eiwa dena dokwak nul srëm gwe-gwenan, hen jal-jal ensa syal nei gwibirin, kirekam de zini Alap sërkam tangan sa karek tabiri.

⁹ Tingare zini men zen kareksa syal nei gwibirin, desa Alap sërkam de kareknak sa kang gulu. Zao sa hëndep denaban go naban lowehe gwer- sap Yahudi zi, hen sap Yahudi srëm zi.

¹⁰ Hwëna men zen dawemna syal nei gwibirin, zëbe mae hap bose dawemsa sa golzimdi, hen Alap mo ngatannak sa hë'ho naban hëndep denaban lowehe gwer- sap Yahudi zi, hen sap Yahudi srëm zi. ¹¹ Sap Alap kim de klis gu'unka, Zen molya ahakore zi ausu ensa nwekam golëakeka.

¹² Zen in zep, Yahudi srëm zi ausuna, Alap Musa mo titi tabin olsa de enlala gwibin srëmkam sa zëre mae mo karek-karek hap karek tabiri, sap zen hom desa tame nuk. Hwëna Yahudi zi ausuna, Musa mo titi tabin olsa de enlala gwibinkim sa zëre mae mo karek-karek hap karek tabiri, sap zen mes desan de ang ta gwen hap Alapsa nen guk gweblak. ¹³ Sap Yahudi zini nen Musa mo titi tabin ola insa de ësane gwe-gwen en nakon bëjen nen Alap mo

* 2:6 2:6 Mzm. 62:12; Ams. 24:12

nwenak ëdakastin. Zen diki men zen desa kitak syal neibir tine gwenan, zen zen ëdakasti'in. ¹⁴ Hwëna Yahudi srëm zini, zen hom sap Musa mo titi tabin ola insa tame nul gwenan. Hwëna zen kim totoresä desan ang ta gwenan, dekam mes dam gwesinin, "Alap onakore titi tabin ola in ki- zëno mae mo enhonakye." Sap zëbon mae hom- Musa mo titi tabin ol ale gunnu inye, ¹⁵ hwëna zëno mae mo syala kon man dam gwesinin, "Alap mes desa zëno mae mo enhonak ing gul sonezimki." Sap zëno mae mo enhonak ki anakare enlala naye, "Kiresa de gonkam ëe mesë karek gwenan," ahaksa, "Kiresa de gonkam ëe dawemsaë syal gwibi'in." ¹⁶ Zep lamkam Alap kim de klis gu'unka, tingare zini nëbe mae hap Alap sa nëre mae mo enhonak de enlalana insa zerwet sozimdi- kire enkam de nësa klis gun hupye. Hwëna ëe men kirekamë Kristus hup de ol dawemna ol halada gwenan, zen kirekam sa lwal: Tingare zisi de klis gun hup de Zini, Zen diki Yesus, sap Alap mes zëbe hap desa de syal gwibin hip dena golblaka.

Mae hap de ol: Yahudi zini nëbon mae onakon Yahudi srëm zini Alapsa lamang da gwenan, sap nen Musa mo titi tabin ola insa ëk enkame urensik gwenan.

¹⁷ Angkam Yahudi zini, nëre mae en habë ale gulzim'in: Sap nen ema anakan ëgu gwenan, "Nen an Yahudi zi sike. Nen Musa mo titi tabin olsa am urensik gwenan. Zep nësa man-am Alap sam gwesibirida gwenda." ¹⁸ Zep nen ema Alap mo dwam gwibinni tame ul gwenan, hen ora dawemna mese dam lasik. Sap Musa mo titi

tabin ola in zen nësa tan-tan ta gwibirin- nen dikim dawem naban karek naban kles so gwen hapye. ¹⁹ Nen ema nënaka enbirida gwenan, “Nen an nwe dimin zisi de ora dawem san zon guluda gwen hap de wenyä zen, hen kawesinnik de lowehe gwen wenyäka de ngatannak golëwet so gwen hap de wenyäye.” ²⁰ Hen ema nënaka enlala eibirida gwenan, “Nen an Alap mo olsa de tawa ta gwibin hip de wenyä zen. Ahakore zi ausuna, zen kitak enlala joblo-topna- walas bete-tek makarena, nen de tawa ta gwibin en hap dena.” Nen kirekame nënaka boltere la gwibirin, sap nen Alap mo olsae urensik gwenan. Hen eiwa, okamanak awe kitak de tame gun hup dena, ausuna zëwe. ²¹ Zep nen Yahudi zini aha ensae titi la gwibirin, hwëna nëna hen ba habe desan ang ta srëm gwe-gwenan? Sap nen anakane tawa la gwibirin, “Bahem ësowë gwen.” Hwëna nëna hen ba habe ësowë gwe-gwenan? ²² Hen nen ema titi la gwibirin, “Bahem ëkahalo gwen.” Hwëna nëna hen ba habe ëkahalo gwe-gwenan? Anakan hen ema titi la gwibirin, “Yang tabin alapna bahem ang gwibirida gwen.” Hwëna nëna hen ba habe zi mo yang tabin alap hap de kire-kirena sowëkam kap la gwenan? ²³ Zep nen an Musa mo titi tabin ola in sa ëk enkame boltere ul gwenan, hwëna karekna in sa ulin hana gwenan, zen Alapsae kim lamang la gwenan. ²⁴ Zen in zep Alap mo olak anakarekam lwak,

“Yahudi zini eno mae mo karek-karek gulin hana gwenna, zen dekon hen aha zi Alapsa

lamang da gwenan.”*

²⁵ Zen in zep, nen dwan Yahudi zini to mip blonsublun en nik em-am lowe he'an, sap Musa mo olak nēbe mae hap dena kirekam am lwak. Hwēna nen de Musa mo aha tītī tabin ol san ang ta gwen srēm kam, ki Alap sa nēsa enlala gwibiri-dala, “Zen san de to mip blom tasibin srēm wenyā.” ²⁶ Zep hen kirekam, Yahudi srēm zini men zen sowe henkam Musa mo tītī tabin ol san ang ta gwenan, desa sa Alap enlala gwibiridala, “Zen sap to mip blom tasibin srēmna, hwēna zen san de Yahudi zi tangan.” ²⁷ Zep Yahudi zini nen de Musa mo ol san ēk enkam ang ta gwenkam, hwēna Yahudi srēm zini in de dawemkam ang ta gwenkam, ki zen sa hwēna aumwa hap de klis gunnuk nēsa anakan swrē dabir, “Zēna waba hap to mip blom tasibin nik lowehe gwēk, hwēna hom Musa mo tītī tabin ola in san ang ta gwēk. Hwēna ēe sap to mip blom tasibin srēm nikē lowehēk, hwēna ēe Musa mo tītī tabin ol san sowe henkamē ang ta gwēk.” ²⁸ Sap tim en nik de Yahudi wal gwenna, zen waba tangan hap. Sap eiwakam de to mip blonsublunna, zen tim en nakon bējen. ²⁹ Zen diki enho nakon de liwe henkam bap. Zep kirekam de ēliwehen wenyā, zen zen ēnwe-mase gwe'an- san de Yahudi zi tangan. Hen kirekam de ēliwe henna, zen Alap mo Enho mo syala kon ki lwa gwenan. Nēre mae mo soson enkam de Musa mo ol ale gun sun ang tankam toton bējen. Enho nakon de ēliwehe gwen wenyā auhu-kama zini hom desa sam neisibirida gwenan. Hwēna Alap Zēna enna

* **2:24** 2:24 Yes. 52:5; Yeh. 36:22

man sam gwesibirida gwenda.

3

Mae hap de ol: Mensa Alap Yahudi zi ausuna gu-gubiridaka, Zen molya desa eititi gwibirki. Zen sa hëndep sul sonezimdi.

¹ Hwëna ano ola insa, Yahudi zini sa husus neibir- mae hap, “Ki san Yahudi zikim de lowe henna hen to mip blom tasibinni zen waba hap?”

² Hwëna ëe ama kirekam de ëgun wenya insa ding gulzim'in, “Zen sap waba hap hom. Zen sap dawem tanganna.” Sap Alap Yahudi zini nëbe mae en hap zëre mo ëpba ola golzimki.

³ Hen ahakon sa asa dakensiblil, “Yahudi zini nen Alapsa anakane en guk gweblak, ‘Ëe asa Musa mo titi tabin ola insa kitak syal ei gwibir.’ Hwëna nen home sowe henkam desan ang tak. Zep san ha Alap hen molya zëre mo nësa de gu-gubiridanna nëbe mae hap sul sonezimki?”

⁴ Zen molya sul sonezim srëm gweka. Sap mes dam gwesik, Alap bëjen boton gwen. Hwëna tïngare zini zen boton tamna. Zen zep hen Daud Bak Alapsa anakan gubluka,

“Em eiwakame zisi klis gul gwenda, hëndep tïngare zini hen kirekam sa Emsa nenblal. Men nara eno klis gunnu in kon ëgunnu, ‘Ëe homë kirekam ëkarek gwek,’ hwëna Em dekam esa zëno mae mo karek-karekna tïngare zi hip goltreizimdi. Zen dekam sa ësaher gwer.”*

Zep Alap taïbliëblan tanganna, zep Zen bëjen sul sonezim srëm gwen- mensa gu-gubiridan naye.

* **3:4** 3:4 Mzm. 51:6

5-8 Hwëna Yahudi zini em bahem Alap mo ebe mae hap de gu-gubiridanna insa kareksa dikim hwëna syal gwibin hip li yul sone gwen. 5,7 Sap ahakore Kristen gwen srëm Yahudi zini auhukama enlala naban anakan yasik da gwibirin, “Ëe sap kië karekna ol gwenan, hwëna Yahudi zini abe mae hap sap. Sap ano mae mo karek gol gwenna, zen dekon aha zi Alapsa anakan tame da'an, ‘Zëno ola Yahudi zi hip dena botonsa hom.’ Zep ano mae mo karek nakon Alap molya asa karek tabirki, sap zini dekon Zënaka tame da gwenan, ‘Zen taïbliëlan tanganna.’ ” 8Hwëna kirekam bahem ëenlala gwe-gwen. Sap kirekam man nwe-mase gwe'an- san de anakan de ëgu gwenna kiye, “Nen kareksa gulin hana gwen-Alap dekakim dawemsa mamkam nëp gol gwizimki.” Ahakon hen anakan asa lamang da gwëk, “Paulus in man kirekam yasik ta gwibi'ira.” Kirekam de asa lamang ta gwen wenya, Alap de karek tabin hip man tangan ëdakast'i'in. 6Zep Alap eiwa taïbliëlan tanganna, hwëna bahem dekon anakan ëkil gïl gwen, “Alap Yahudi zini ano mae en mo karek-karekna nwe-enkam sa kara gul gwizimdi.” Kirekam hom tangan Alap hap sam gwesibli'an, sap Zen eiwa kïtak de okamanak de zisi sa klis gulu.

Mae hap de ol: Tïngare zini Alap mo nwenak dawemna hom.

⁹Zep san ha Yahudi zi en hap sa Alap dawemna golzimdi?- hwëna aha zi ausu ensa sa zëre mae mo karek-karek nakon karek tabiri. Kina ki kirekam bëjen. Diki men kirekamë nonol emsa gubiridal, zen kirekam sa lwal: Sap Yahudi zi,

sap Yahudi srëm zi, zère mae mo karek-karek nakon tingan mes kareknak de kang gun hup ëdakastik. ¹⁰ Zep zen man Alap mo ol ale gun nuban dakastî'in- anakan men zen lwan dakye, "Auhu-kama zini Alap mo nwenak de dakastinnî aha-en mae hom tangan.

¹¹ Sap aha-en mae hom- Alap mo dwam gwibinsi de tame gun nuye, hen Desa de tēblan hap de enlala nabare zi niye.

¹² Tîngare zini mes Alapsa hli dak. Kire zini Alap mo nwenak ase naban.

Hen dawemsa de gol gwen zini aha-en mae hom. Eiwa, hom tangan."*

¹³ "Zëno mae mo ol torankam men zen nopna ëk tihî nakon wet so gwenan, zen san de zi tok asena kiye.

Hen ol boton-botonkam man zënaka hit di gwibirin."

"Hen zëno mae mo ëk tihî nakon in zen wet so gwenan- san de wanya mo zisi de hit tinnak de sosonna kiye."*

¹⁴ "Zëno mae mo ëk tihî nakon men zen wet so gwenan, zen zisi de karek tabin en hap dena hen lamang ta gwibin en hap dena."*

¹⁵ "Zen man tangan zisi de tamera gwen hap ësyal-syal gwe-gwenan."

¹⁶ "Zini men desan ëtënda gwenan, zen karek ensa zi bose zikhip nolzimmira gwenan, hëndep zep enlalana ëdowe hana gwenan."

* **3:12** 3:12 Mzm. 14:1-3; 53:1-3 * **3:13** 3:13 Mzm. 5:10; 140:4

* **3:14** 3:14 Mzm. 10:7

17 “Zen hom aha zi niban de umlaekam golëlowehen hap de orana tame dak.”*

18 Hen “Alapsa de blikip gwesiblinna mes kitak baes tak.”*

19 Zep zi de kitak Alap mo nwenak ëkarek gwen hap de Alap mo ola in, zen Yahudi zini nen hen zëwe bitï gwe'an. Nen hwëna ema ëkil gïl gwek, “Musa mo titï tabin ol san de ang ta gwenkam esa Alap mo nwenak ëdakastil.” Hwëna Alap mo aha ola in kon man tangan dam gwesinïn, “Hom tangan zini- Alap mo nwenak de zëre mo syala kon dakastin niye.” Zen hwëna mae hap titï tabin ola in sa nöp golzimki: Tïngare zisi dikim saherak kang gun hup- Zen kim de nësa klis gu'unkaye, sap Yahudi zi, sap Yahudi srëm zi. Dekam toton nara dep?- Alapsa de anakan gublunna, “Ano karekna hom.”²⁰ Zep zini toton bëjen Alap mo nwenak ëdakastin- Musa mo titï tabin ola in sa de syal gwe-gwibin nikonye. Sap titï tabin ola in, zen man nësa anakan hleng sosubirida gwenan, “Em in kitak kareksae ol gwenan.”

Mae hap de ol: Nen Yesussu de taïbliëlan en nakone Alap mo nwenak ëdakastil gwenan.

²¹ Zep nen de Alap mo nwenak ëdakastin hip dena, zen Musa mo titï tabin ol san de ang ta gwenkam bëjen. Hwëna angkam Alap zëre mo nwenak de ëdakastin hip de ora ësena mes nëbe mae hap sal tazimki. Hen ora ësena in hap dena Musa mo titï tabin olak hen Alap mo olsa de ayang gul gwen zi mo olak mes hamal hap

* **3:17** 3:17 Yes. 59:7-8 * **3:18** 3:18 Mzm. 36:2

ale nuk. ²² Zep angkam Alap mo nwenak de ëdakastin hip dena, zen diki Bian Yesussu de taibliblan en nakon. Kitak men zen de Yesussu daiblibla'ak, sap Yahudi zi, hen Yahudi srëm zi, zen zen sa Alap zëre mo nwenak ëdakastil. Sap zëre mo nwenak, zi ausuna srën-srënkam hom, ²³ hwëna kitak kareksa nulin halasen gwenan, hëndep zep Alap zëre onakon mes ëlanga gwesik hen kawesinnik lowehe gwenan. ²⁴ Sap eiwa kirekam, hwëna angkam Alap zëre mo kwasang-kwasang en nakon nësa zëre mo ngatan san dep golëwet so gwe'ara- ba maesa de zëbe hap syal gwibir-blin srëmkam. Zep Kristus onakon nësa gubirida'ara, "Angkam em mese ëdakastil- ëre mo nwenakye." ²⁵ Sap Alap mes Yesussu zer soneka- dekam de orasa nëbe mae hap kles tyasizimdin hip, nen dikim zëno kala kon zëre mo nwenak ëngan gwehen hap denaye. Zep nen de kirekam Yesussu taibliblankam, dekam nëno mae mo karek-karekna man nëp tap gulsuk gwizimnira, hen hom etan nësa jal gwibirida'ara. Zen Alap mae hap ki kirekam syal gwibirki: Dekam de zi Zënaka anakan tame tan hap, "Zen eiwa enlala dam-dam enkam klis gul gwenda." Sap menkam Alap holokam zi mo karek-karekna nwe enkam kara gul gwizimki. ²⁶ Hwëna angkam Kristus onakon zep Alap anakan klis gul gwizim'ira, "Men zen Yesussu daibli gwebla'an, zen zen ëre mo nwenak ëdakastil gwe'an. Men zen daiblibla srëm gwe'an, zen hom." Kirekam de Alap klis gulzimdinni aäris, sap Zen Zën zëre mo nwenak dikim ëdakastin hip de orana insa zerzimki.

27 Zep angkam nen bëjen nen nënaka anakan boltere ta gwibin, “Èe mes-am ère mo syala kon Alap mo nwenak dakastik.” Diki tangan Alap mo nwenak de ëdakastin hip dena zen Yesussu de taibliblan en nakon. 28 Sap nen Kristussu de taibliblan en nakone ëdakasti'in. Musa mo titi tabin olsa de syal gwe-gwibin nikon hom. Zep nen bëjen nen nënaka anakan boltere ta gwibin, “Èe ère mo syala konë dakasti'in.” 29 Zep Yahudi zini nen bap nen ëkil gil gwen, “Alap, Zen ano mae en mo. Aha zi ausu mo Alapsa hom.” Zen hen aha zi ausu mo Alap sake! 30 Sap nëno mae mo Alapna aha-en. Zen Zen Yahudi zini nëbe mae hap zëre mo nwenak dikim ëdakastin hip dena Kristussu de taibliblan nakon gol gwizim'ira. Hen Yahudi srëm zi hip Zen hen kire hap dena Kristussu de taibliblan nakon gol gwizim'ira. 31 Hwëna kirekam de lwankam, zini sa asa anakan dakensiblibl, “Ki san em mese Musa mo titi tabin ola insa zalta dep tahan san gwei gubir kinila?” Kirekam bëjen. Hwëna nen mese titi tabin ola insa eiwa de uk, sap nen de Kristus onakon ëngaya gwen hap dena mes zëwe hamal hap ale nuk.

4

Mae hap de ol: Abraham Bak zen hen Alapsa de taibliblan en nakon Alap mo nwenak dakastilki.

¹ Zep Yahudi zini, nëno mae mo auyanna Abraham Baksa de enlala gweblankam, zen banakan

gwëka?– zep Alap mo nwenak dakastilkiye. *

² Zen de zëre mo syala kon Alap mo nwenak dakastinkim, zen maka anakan zënaka boltere taka, “Èe mesë aha zisi beya tangankam kweikwik guk.” Hwëna zen bëjen Alap mo nwenak kirekam zënaka boltere tan. ³ Sap zëbe hap dena Alap mo olak anakan lwak,

“Abraham zen Alapsa taïblihlaka, zep Alap anakan gubluka, ‘Em mese ère mo nwenak dakastili.’ ”*

⁴ Zep anakarekam lwa'an: Zi de te-ala hap syal gwenkam, mam zik de te-alana insa golblankam, zen bëjen anakan enlala gweblan, “Zen totoresa ap golblala.” Hwëna zen sa anakan enlala gwera, “An ère mo syala kon ap golblala.” Zep hen kirekam, zi de Alap de dawemsa zëbe hap golblan hap syal gwenna, zen bëjen anakan enlala gwen, “Zen totoresa abe hap golblaka.”

⁵ Hwëna zini men zen ësyal gwen srëmkam Alap ensa anakan daïblihla'an, “Karek gol gwen zi hip Zen Zën ngaya gwen hap dena totoresa Kristus onakon gol gwizimnira,” zen eiwa kire zisi Alap gubirida'ara, “Zen zen ano nwenak ëdakasti'in.” ⁶ Zen in zep Daud Bak hen kirekam enlala gwëka– isrip-sri gwibinnik de lowehen wenyä kim hamal hap hlauluda gukuye, men

* **4:1** 4:1 Alap zëre mo nwenak de dakastin hip dena insa gubluka, zen in kim Abrahamsa hamal hap auyan-aza zeban de hë'ho gwibin tangan naka zihlaun hup dena gu-gublukake. Hwëna dekam Abraham bogolik walas srëmkam gwë'anka. Sap kirekam hwëna zen Alap mo gu-gublun ola insa man taïlibirki. Zen zep Alap anakan gubluka, ‘Em mese ère mo nwenak dakastili.’ (Kej. 15:1-16; Rom. 4:13; Gal. 3:6) * **4:3** 4:3 Kej. 15:6

desa Alap zère hap de ba maesa syal gwibir-blin srëmkam anakan gubirida'araye, "Em ema ano nwenak ëdakastï'in." Daud anakan gubiridaka,

⁷ "Zini men zëno mae mo karek-kareksa Alap ngan gulsuk gwizim'ira hen tap gulsuk gwizim'ira, zen isrip-sri gwibinnik lowehe gwe'an.

⁸ Hen men zëno mae mo karek-kareksa Alap aïtbir-zim srëm gwe'ara, zen hen isrip-sri gwibinnik lowehe gwe'an."*

⁹ Men zen de kirekam isrip-sri gwibinnik lowe he'ak, zen Yahudi zi en molya. Hwëna zen hen Yahudi srëm zi niban esa apdenak. Sap nen mese Abraham hap dena insa anakan tame uk, "Zen Alapsa taïbli-blaka, dekon en zep Alap mo nwenak dakastïlki." ¹⁰ Zep Alap kim Abrahamsa kirekam gubluka, san ha to mip blonsublun naka? San ha kire srëm naka? Zen eiwa dekam to mip blonsublun srëm nik gwë'an- Alap in kim kirekam gublukaye! ¹¹ Zen hwëna hyanak to mip blonsun hup gubluka- dekam de zënaka anakan zertrën hap, "Ëe mesë Alapsa taïbli-blak- men dekam asa anakan gublukaye, 'Em mese ëre mo nwenak dakastïli.'" Zen in zep Abraham Bak nwe-mase gwe'ara, zen hen to mip blonsublun srëm nik mo bian- tïngan men zen Alapsa de taïbli-blak nakon zère mo nwenak ëdakastïl gwenanye. ¹² Hen kirekam Abraham Bak zen tïngare to mip blom tasibir-zimdin nik mo Bian- men zen en Alapsa zère mo kim daïbli-blak'anke, men kirekam Abraham zëna to mip blonsublun srëmnak taïbli-blakake.

* **4:8** 4:8 Mzm. 32:1-2

Mae hap de ol: Alap mensa Abrahamsa gu-gubluka, dawemsa de auyan-aza zikhip golzimdin hip dena, zen hwëna Alapsa de taïbliðlan enkam esa ulin.

¹³ Alap mensa Abrahamsa gu-gubluka, auyan-aza zeban de okamasa zibi gwibin hip, zen dwan Musa mo titi tabin ol de hatan srëmnak kirekam gu-gubluka. Zep Abraham dekam hom desan ang gweka- dekam de Alap mo nwenak dakastin hip, hen dekam de dawemna insa golblan hapye. Zen hwëna Alapsa de taïbliðlan en nakon ki zëbe hap kirekam lwablak. ¹⁴ Sap anakan de lwa'anam, "Titi tabin ol en san de ang tankam esa Abraham mo walas hap ëliweher," ki Alap menkam waba hap Abrahamsa gu-gubluka- zëre mo nwenak de dakastin hip. Hen nëbe mae hap Abraham mo kim de Alapsa taïbliðlanna waba hap maka lwa'an. ¹⁵ Eiwa, nen bëjen nen titi tabin ol san de ang ta gwen en nakon ëdakastin. Sap zini men zen desan de ang tan hap ëalp gwe-gwenan, hwëna sul sonenna toton banakan dep? Zen in zep Alap mo jal ennak lowehe tine gwenan. Diki titi tabin ola in de lwan srëmkam bap. Dekam basa molye ulmun gwe'anam!

¹⁶ Zen in zep, Alapsa de taïbliðlanna kunci makan nëbe mae hap lwazim'in! Sap Alap man nësa anakan dwam gwibirida gwe'ara, "Ëe mensaë Abrahamsa orep gu-gubluk, zen dikire totoresä Yesussu de taïbliðlan en nakon nulin gwëk." Zen eiwa nen esa ulin- sap Yahudi zini men zen Musa mo ola nama enlala nei gwibirin, hen sap Yahudi srëm zini men zen desa enlala neibir srëm gwe-gwenanye. Sap nen

ema Abraham mo kim Alapsa laiblibla'an. Zen in zep Abraham Bak anakan nwe-mase gweka, "Zen tingare Alapsa de taibliblan zini neno mae mo bian." ¹⁷ Zen zep Alap Abrahamsa anakan gu-gubluka,

"Ee ama emsa gublu'an- zi ausu beya mo bian hap de jowen hap."*

Zep Alap mo ola in kon, Abraham man nwe-mase gwe'ara, "Zen neno mae mo bian." Sap zen Alapsa anakan taibliblaka, "Zen Zen juwen zisi ngaya ta gwibirida, hen Zen Zen ba maena totores a de jowen hap ol gu anen enkam gu gwibirida."

¹⁸ Diki Abraham maka anakan enlala gweka, "An molya kirekam lwak, sap ee we walya ban mesé tangan bogol ek. Zep ee banakan dep?- walas en naye." Hwena zen nama Alapsa taibliblaka- mensa anakan gu-gublukake,

"Zi ausu beyana emsa 'bian'kam sa nen gwe-blal."

Sap Alap mes hen anakan gu-gubluka,

"Eno auyan-aza tane walya sa beya gwe song gwer- san de nglinak de keis mo beyana kiye."*

¹⁹ Abraham dekam hom mae anakan enlala gweka, "Ee banakan asa walas er?- sap ee an tin hip mes-am tangan golek de gwer. Sap ano gwen tahunna seratusnuk dep man-am golek de gwe'an. Hen Sara Bak mo wal gola mes-am yok gwibik." ²⁰ Sap eiwa kirekam, hwena Abraham mo Alapsa de taibliblanna hom mae sin gweblak. Hwena man tangan tatete gweblak.

* **4:17** 4:17 Kej. 17:5 * **4:18** 4:18 Kej. 17:5; 15:5

Zen zep tangan Alapsa anakarekam boltere taka, “Bian, Ema asa sam taka, sap men kirekam asa gu-gubluka, Em esa kirekam ap syal gwibir-blira.” ²¹ Hen zen man tangan Alapsa anakan taibliblaka, “Men desa asa gu-guk gweblaka, zëno sosonna ki- kirekam de owas-owassa dikim abe hap syal gwe-gwibir-blin hap denaye.” ²² Zen sërkam tangan Alapsa taibliblaka, zen in zep zëbe hap dena Alap mo olak anakan lwak,

“Em mese ëre mo nwenak dakastili.”

²³ Alap mo nwenak de dakastin hip dena insa ale nuk, zen Abraham en hap hom. ²⁴ Zen hwëna kitak nëbe mae hap- men zene Alapsa anakan laiblibla'anke, “Zen eiwa mes Bian Yesussu tin nikon ngaya taka.” Kirekam de taibliblanna in, nen dekone Alap mo nwenak ëdakasti'in. ²⁵ Sap Alap Zen nëno mae mo karek-karek hap Yesussu tin hip sosok taka, hwëna ki zep etan ngaya takadekam de nen anakan tame gun hup, “Nen an zene Desa laiblibla'an, nen ema Alap mo nwenak ëdakasti'in.”

5

Mae hap de ol: Nen mese Alap han ërumlae gwek, zebe isrip-sri naban lowehe gwe'an.

¹ Zen in zep, sap nen mese Kristussu de taibliblan nakon Alap mo nwenak ëdakastik, zen in zebe Alap han ërumlae gwe'an. Zen kitak Bian Yesus mo syala kon ki kirekam lwak. ² Sap nen mese Yesussu kirekam laibliblak, zen in zebe hen Alap mo kwasang-kwasangnak lowehe gwe'an. Nen in zebe ëisrip-sri gwe-gwe'an, sap nen ema hen Alapsa anakan laiblibla'an,

“Zen sa eiwa zère mo ngatannak de lowehen hap dena nèbe mae hap golzimdi.” ³ Hen kareksa de goltowe gwen nakon zebe èisrip-sri gwe-gwenan, sap nen mese anakan tame uk, “Kareksa de goltowe gwenkam, zen dekam tangan esa Yesussu de taïbli-blannak de tatem èzauk gwen hap dena tame ul.” ⁴ Kareksa de goltowe gwennake tatem èzauk gwe'ak, zen dekam esa Alapsa de taïbli-blannak èzise gwer. Hen kirekam de èzise gwenkam, zen dekam tangan esa Alapsa de anakan taïbli-blanna esek ulse gwer, “Eiwa, nen esa tangan ulin- mensa Alap zère mo walas hap de golzindin hip gu-gubirida gwekaye.” ⁵ Sap nen mese tangan Alap mo gu-gubiridanna in sa de gul irin hip laïbli-bik, zen zebe enlalana èdowe hana srèm gwe-gwenan. Sap nen ema nère mae mo enhonak anakan eis gwibirin, “Eiwa, Alap mo nèbe mae hap de kwasangna mam tanganna.” Kire enlalana in, zen Alap zère mo Enho nèp ing ta sone gwizimnira, sap nen eiwa zère mo Enho nabane èrgwè gwenan.

⁶ Nen kime anakarenak lowe he'ak, “Toton banakan dep?- nënaka de ngaya tabin niye,” hwèna kirenak zep Kristus hataka- Alapsa de tame tan srèm zini nèbe mae hap de tìn hìpye. ⁷ Zen owaskam ki lwak. Sap zini nen home nabakam nënaka tìn hìp sosok la gwibirin- dekam de aha zisi ngaya tabin hìpye, sap zi dawem mae hap. Hwèna san ha emaka hen nère mae mo timni olgu'un?- wal bose dawem mae hap de tìn hìpye. ⁸ Sap eiwa zini nen kirekam. Hwèna Alap zère mo kwasangsa sèrkam tangan

nëbe mae hap goltreizimki, zep hëndep karek-karek gol gwen zini nëbe mae hap Kristus tilki. ⁹ Zen in zep, mes tangan dam gwesinîn: Sap nen mese Kristus mo kala kon Alap mo nwenak ëdakastil, Kristus hen sa nësa Alap mo jala kon il gwe hebiridala. ¹⁰ Sap nen kime Alap mo gil-gil gwibiridan zi mo kim lowe he'ak, hwëna Tane zem Yesus dekam zep nëbe mae hap tilki- nësa dikim Alap golëumlae gwen hapye. Zep angkam mes tangan dam gwesinîn: Kristus sa nësa Alap mo jal hil gin nikon il gwe hebiridala. Sap Zen mes eiwa tin nikon ngaya gweka, hen Zen nama nësa de mas gwibirida gwen hap gwë'ara.* ¹¹ Sap eiwa nen mese kirekam Alap han ërumlae gwëk, zen in zebe tangan ëisrip-sri gwe-gwe'an. Zen kitak Bian Yesus onakon ki kirekam nëbe mae hap lwazimk.

Mae hap de ol: Adam Bak zen tin hip de orana zen nëbe mae hap kles tyasizimki, hwëna Kristus Zen Zen ëngaya gwen hap de orana kles tyasizimki.

¹² Zep a kirekam mo lwakye: Adam Bak kim kareknak zanka, zen dekam zep kareksa de gol gwen hap de sosonna hen kire hap de hole-hlena okamanak de zinik kitak ing gwe hebiridak, hëndep angkam zep tingare zini karekna nolada gwenan. Hëndep Adam Bak mo karekna in kon zep hen tin hip de sosonna tingare zi hip hata gwizimnin. Zen in zebe hëndep angkam juwe gwe'an, sap kitak de zini nen Adam mo kime kareksa ol gwenan. ¹³ Dekam hwëna Adam Bak

* **5:10** 5:10 Ibr. 4:14-16; 7:23-28

mo hyanak, zini dekam sap karekna nol gwek-Musa de hatan srëmnakye. Hwëna desa bëjen anakan gubiridan, "Zen Musa mo titi tabin olsa nulmun gwek," sap dekam Musa mo titi tabin ola hom okamanak hata'ak. ¹⁴ Sap eiwa kirekam, hwëna Adam Bak mo hyanak hëndep in kim Musa Bak hataka, dekam tin hip de sosonna nama okamana ansa bi gwibik. Hwëna dekam de zini sap hom Adam Bak mo kim Alap mo jalse gwen ola nulmun gwek, hwëna ki juwe gwek. Zen in zep Adam han Kristus hun, zen apdenak hom, hwëna tingare zini zëbon nebon onakon nulin gwenan.

¹⁵ Zen in zebe nen srën-srënkam ulin gwenan: Adam onakon zen kareksa de gol gwen hap denaka. Hwëna Yesus onakon, zen Alap onakore kwasang-kwasangsae ulin gwenan. Aha-ere zini Adam kim Alap mo jalse gwen ola gulmunku, dekon zep hëndep tingare zini juwen hap dena insa nulink. Hwëna angkam man tangan dam gwesinin: Aha-ere Zini Kristus onakon beya tangan nik esa hen hëndep de ëgwën hap dena ulin gwer, sap Alap mo nëbe mae hap de kwasang-kwasangna Zëbon onakon man tangan taman kin gwenan. ¹⁶ Aha zini Adam Bak mo karek gon nakon, kitak de zini dekam zep Alap mo jalak de kang gun hup ëdakasti'in. Hwëna mensa Alap angkam syal gwibir-zim'ira, zen wehasa hom! Sap zi mo karekna kim tangan mam gwe song gwek, dekam zep hwëna Alap Kristus onakon zëre mo nwenak dikim ëdakastin hip de orana totoresa kles tyasizimki. ¹⁷ Zep aha-ere zi mo karek nakon, zep tingare

zini juwe gwenan. Hwëna tïngan men zen Alap mo sërkam de kwasang-kwasang nakon zëre mo nwenak ëdakastil gwenan, zen zen zep karek gol gwen hap de sosonna in kon hen juwen hap de soson nakon wet so gwe-gwenan. Zen kitak aha-ere Zini Kristus Yesus onakon- men Zen sa hëndep denaban nësa golëlowehe gweraye.

¹⁸ Zep Alap aha-ere zi mo karek nakon zep tïngare zini karek tabin hip gubiridaka. Hen kirekam, kim aha Zini in Alap mo dwam gwibin sin Zënaka zerguku, zep tïngan men zen de Desa ang në gwebla'ak, zen sa Alap mo nwenak ëdakastil, hëndep zep sa ëngaya gwer. ¹⁹ Hen kirekam, aha-ere zini kim Alap mo jalse gwen ola insa gulmunku, zen dekam zep tïngare zini Alap gubiridaka, "Zen kitak kareksa de gol gwenna." Hwëna aha Zini kim nër hom Alap mo dwam gwibin tanganna syal gwibirki, zen dekam zep Alap zëre mo nwenak dikim ëdakastin hip de orana zi beyana nëbe mae hap kles tyasizimki.

²⁰ Zep Alap mae hap titi tabin ola insa Musa hap golblaka: Dekam de zë zi zëre mae mo karek-kareksa anakan tame gun hup, "Nen eiwa beyakame karekna ol gwenan." Hwëna karekna kim tangan mam nul song gwëk, hwëna Alap mo nëbe mae hap de kwasang-kwasangna dekam hen man tangan taman kinik. ²¹ Zen in zep, men kirekam kareksa de gol gwen hap de sosonna tïngare zini nësa bi gwibiridak, hëndep dekon zebe juwe gwenan, hwëna angkam Alap mo kwasang-kwasang mo soson nësa bi gwibirida'an. Zen dekon zebe hwëna Alap mo nwenak ëdakastil gwe'an, hen hëndep

de lowehe gwen hap dena dekam zebe Bian Kristus Yesus onakon ulin gwe'an.

6

Kristen zini nen de anakan ëenlala gwe-gwen hap de ol: "Yesus hun Zen abanë lik, hen kim ngaya gweka, Zen abanë ngaya ëk."

¹ Hwëna em ahakon anakan esa asa enblal, "Alap man-am nëbe mae hap Kristus onakon kwasangna mam gulsuk gwizimnira, zep nen sap esa karekna ol tine gwer." ² Hwëna kirekam bëjen! Nen mese kareksa de gol gwen hap de sosen nakon juwek, zep angkam bap nen etan zëwe lowehen. ³ Em san home ansa tame u'in? Nen kime baptis tabin sin ang ta gwëk, dekam zebe nënaka Alap hap anakan olëtrë gwëblak, "Ëe ama Bian Yesus hun de zeraha-en gwen hap dwam gwe'an." Zep Zen kim tilki, zen san de nëban mae de golëjuwenna kiye. ⁴ Zep nen kime baptis tabin sin ang ta gwëk, zen dekam zebe ënwe-mase gwëk- san de Kristus mae han de apdenak kama hulak kang gul nenna kiye. Hen kirekam, Alap kim zëre mo ngatan zi mo lang nakore sosenkam Kristussu tïn nikon ngaya taka, zen dekam zebe anakan hen eisbi'in- san de juwen nakon de ëngaya gwenna kiye. Nëno mae mo lowe henna dekam zep lowehen ëse san dep liwehe gwenan.

⁵ Zep insa Yesus kirekam nësa golëjuwëka, zen dekon zep dam gwesinïn: Nen esa Deban etan ërngaya gwer. ⁶ Zep angkam tangan mes anakan dam gwesil, "Nëno mae mo auhu-kama

zi mo hole-hlena mes Kristus te-lidak sonnak goltilkī.” Zep nen angkam mese kareksa de gol gwen hap de sosen nakon wet so gwer- men zen sap nēsa bi gwibiridakye, okamanak de timni an de tīn makan. ⁷ Sap nen kime juwe gwenan, zen dekame kareksa de gol gwen hap de sosen nakon wet so gwe-gwenan. Zep hen kirekam- nēsa kim Kristus golējuwekaye.

⁸ Nēsa eiwa mes Kristus golējuweka. Zen in zebe angkam anakan laīblībla'an, “Zen Zen sa asa golēlowehe gwera.” ⁹ Sap nen mese anakan tame uk, “Kristussu mes Alap tīn nikon ngaya taka, zep Zen molya etan tīlkī.” Angkam tīn hīp de sosonna molya etan Desa dot soblak. ¹⁰ Zen kim aha-rok'nen tīlkī, dekam zep kareksa de gol gwen hap de sosonna men zen tīngare zini nēsa bi gwibiridak, desa goltilkī. Zep Zen molya etan kire hap Zēnaka sosok taka, hwēna angkam Alap en mo bosesa de mam gulblun hap gwē gwe'ara.

¹¹ Nen hen kirekam nen nēnaka enlala gwibirida gwen, “Ēe mesē angkam kareksa de gol gwen nakon tīk, hen angkam Kristus hun de zeraha-en gwenkam Alap en mo bosesa de mam gulblun en habē gwē'an.”

¹² Etan bap zen kareksa de gol gwen hap de sosonna nēno mae mo auhu-kama timni bi gwibin- dekam de zēno hole-hle san ang ta gwen hapye. ¹³ Nen bap nen nēre mae mo timnik de hli-hlina aha-en mae dowal mo kīgī mo syal san dikim ang gwen hap sosok gul gwen. Diki Alap en hap nen sosok gul gweblan. Sap nen menkam tok-tok makare nike lowehe gwek, hwēna angkam Zen mes nēsa ngaya tabirki. Zep

nëno mae mo timnik de hli-hlina diki Alap en mo dwam gwibin sin dikim ang ta gwen hap nen sosok gul gwen. ¹⁴ Zen in zep, kareksa de gol gwen hap de sosonna bap zen etan nësa bi gwibiridan. Sap nen home angkam Musa mo titi tabin ola anakare enlala naban blol eibi'in, "Ëe dekon asa Alap mo nwenak ëdakastil." Hwëna angkam Kristus hun de zeraha-en gwenkame zëre onakore kwasang-kwasang ensa blol eibi'in. Zep nen mese kareksa de gol gwen hap de sosen nakon ëhil gwe hanal.

Mae hap de ol: Sap nen kareksa de gol gwen hap de sosen nakon mese ëhil gwe hanal, nen esa nëre mae mo timsi Alap hap sosok ulblir.

¹⁵ Hwëna kirekam insa lwa'an, ahakon anakan esa ëgul, "Nen home angkam Musa mo titi tabin olsa de syal gwe-gwibinkim Alap mo nwenak de ëdakastin hip ëalp gwe-gwenan, sap nen mese Kristus mo kwasang-kwasang nakon ba maesa de syal gwibir-blin srëmkam ëdakastik. Zep sap esa karekna ol gwer." Hwëna kirekam bëjen.

¹⁶ Diki anakan emaka dam ulsu'un, "Ëyë ëre mo timsi aha zisi de ang gweblan hap sosok gu'uk, dekam ëe san de zëbon de babu gwenna kiye." Zep hen kirekam, eme ere mo timsi kareksa de gol gwen hap sosok u'ik, dekam Alapsa ema syauk bla san dep hli la'an. Diki Alap habe sosok ulbli'ak, dekam esa enho nakon ëliwehe gwer- zëre mo dwam gwibinsi dikim syal gwibin hipye. ¹⁷ Hwëna dawemsa nen Alap hap gol gweblan! Sap menkam nësa kareksa de gol gwen hap de sosen bi gwibiridak. Hwëna angkam nen

mese tïngare enho naban ang tal- ëngaya gwen hap de ol dawemna ansa Alap nëbe mae hap golzimkiye. ¹⁸ Zep nen angkam mese Kristus onakon kareksa de gol gwen hap de soston nakon ëhïl gwe hanal. Zep angkam men Zen nësa ïrik gi'ïra, Zen Alap. Zebe enho nakon zëre mo dwam gwibinsi dikim syal gwibin hip ëdwam gwe-gwe'an.

¹⁹ Ëe anik dam-dam enkam srip gulsuzimk-dekam deka auhu-kama enlala zi ano ola ansa karekkam tame nul srëm gwek: Nen menkam nëre mae mo timni kirekam-kirekam jal-jal hen hole-hle san dikim ang ta gwen habe sosok ul tine gwek. Hwëna angkam nëre mae mo timni Alap mo dwam gwibin en san dikim lowehen hap nen sosok gul gwen- ekakim Alap mo nwenak ëtal gwesik. ²⁰ Nësa kim kareksa de gol gwen hap dena bi gwibiridak, Kristus dekam hom nëban mae enho nakon golëgwë gweka- dekam de nësa ora dawem san dep dam tasik gwibin hipye. ²¹ Hwëna nen waba tangan habe zëwe ëbabu gwe-gwek! Zen in zebe angkam ësaher gwe-gwe'an- nëre mae mo lowehen ëpbana insa de enlala gwe-gwibinkimye. Sap nen dekam juwen en hap de ora sane ang ta'ak. ²² Hwëna angkam nen mese kareksa de gol gwen hap de sostonna in kon ëhïl gwe hanal, dekam zebe hwëna Alap hon ëbabu gwe-gwe'an. Hen zen waba hap hom. Zen zebe angkam Alap hon de ëtal gwesinkim ëliwehe gwe'an, hen hëndep de gwën hap dena zen dekon esa ulin. ²³ Sap kareksa de gol gwenkam, dekam hwëna tïn hip de ora san esa ang tal. Hwëna Bian Kristus Yesus

hun de zeraha-en gwenkam, dekam Alap händep de gwën hap dena totoresa nëbe mae hap gol gwizimnira.

7

Mae hap de ol: Nen mese Musa mo titi tabin ola kon ehil gwe hanak.

¹ Aya-wal oso-wal, em mese Musa mo titi tabin ola tame uk. Zen in zebë emsa enlala sobirida'an: Titi tabin ola in, nen kim nama okamanak lowehe gwenan, zen dekam en dep dena. Tinkim Musa mo titi tabin ola insa ema hli kul gwenan. ² Zen san de we-zi dare de zënaka leisyanna kiye. Titi tabin ola kon, zini in de nama gwënnak, wenyä in bap zen aha zisi zen. Hwëna zi zik de tinkim, dekam titi tabin ola in hom tru-tru gulbi'in- zen de aha zisi zen hapye. ³ Wenyä in de nonol zi zeban nama ënnak aha zisi zenkam, dekam emaka enbi'in, "Zen mes kahalo gwëk." Hwëna zi zik de tinkim de aha zisi zenkam, dekam bëjen anakan enlala gwibin, "Zen man kahalo gwëk." Sap dekam zen mes titi tabin ola in kon hil gwe hanak.

⁴ Zen in zep hen angkam nëbe mae hap kirekam lwa'an: Sap nësa mes Kristus te-lidak sonnäk golëjuweka, zep nen angkam mese Musa mo titi tabin ola kon ehil gwe hanak. Hen angkam nen mese tin nikon de ngaya gwen Zini Kristus hun ëraha-en gwer. Zep nen an angkam mese Kristus mo bi gwibiridan zi hip ëliweher-Alap mo bosesa dikim mam gun hup ekakim dawemsa syal ei gwibik. ⁵ Nen kime auhu-kama

ennak de enlalakam lowehe gwek, dekam auhu-kama tim nikore hole-hlena man tangan nësa kyang gulsuk gwek. Dekam kim Musa mo titi tabin ola in san de ang tan hap sap ëalp gwe-gwek, dekam tangan zep hwëna auhu-kama tim nikore hole-hlena mam gwe song gwek. Hëndep dekam zebe ein juwen ora san ang ta gwek. ⁶ Hwëna angkam nen mese titi tabin ola in kon ëhil gwe hanal- nen kime Kristus mae han apdekam juwekke. Zep angkam Alap zëre mo Enho nësa enho nakon titi ta gwibi'ira, zebe tïngare enho naban Bian mo dwam gwibin sin ang ta gwe'an- Musa mo olsa de enlala gwibin srëmkamye.

Paulus kim kareksa de gol gwen hap de soson naban goleija gwekake:

⁷ Hwëna bahem ano ola kon ëkil gin, "Titi tabin ola mensa Alap Musa Bak hap golblaka, zen karekna." Zen sap karek naka hom. Hwëna ëe dekonë ëre mo karek-karekna tame guk. Zëwe kimë anakarekam sane gwe-gwek, "Zi mo bi gwibin kire-kirena bahem dwam gwe-gwibin," dekon zebë tame guk, "Hare ano dwam-dwam enlalana an kareknak am ti'in!" ⁸ Hwëna dekam zep kareksa de gol gwen hap de sosonna in ano enhonak kirekam-kirekam dwam-dwam enlalasa ap beya gul gweblak. Sap kareksa de gol gwen hap de sosonna in, enho nakon anakan asa titi ta gwek, "Em sap esa jalse gwen ola in sa ngip gul gwera." Hwëna jalse gwen ola in de lwan srëmkam, ki molya ngip gun hup kirekam asa titi ta gwe'anam. ⁹ Eë kimë orep Musa mo jalse

gwen ola insa tame gul srēm gwe'ak, ēe dekam ēre mo gwēna ama eis gwibik, “Ēe dawemkamē gwē gwenan.” Hwēna jalse gwen ola insa kimē tame guk, dekam zebē anakan eisbik, “Ēe an hare kareksa de gol gwen zi sike, zep ēe hen syauk sun dep am-am gwē ha'an.” ¹⁰ Zep Musa mo tītī tabin ola in sap aīrīs. Hwēna ēe ama menkam desa hen kil gī'ik, “Ēe dekon asa ngaya gwer.” Hwēna ēe desan kimē sap alp gwe'ak, dekam zebē tame guk, “Hare ēe an kareksa am gol gwe'an, zep ēe an hen tīn hīp de ora san am ang gwe-gwe'an.” ¹¹ Hen kareksa de gol gwen hap de sosonna in zen abon lwa gwek, zen man anakan asa boton ta gwek, “Em sap esa tītī tabin ola ansa ngip gulu. Ebe hap man sam gwešibli'an.” Zen in zep hēndep ano dwam-dwamna mam gwe song gwek, hēndep holo gwennak zebē anakan tame guk, “Ēe makare karek gol gwen zini toton molyē ngaya gwek.” ¹² Hwēna sap tīngare tītī tabin ola insa Alap nēbe mae hap golzimki, zen aīrīs, hen nen dikim dam-dam enkam lowehe gwen hap dena. Zen Alap zēre mo dwam gwibinsi kim sap nēbe mae hap goltreizimki.

¹³ Hwēna Musa mo ola in kim asa ngip gun hup dena insa tawa tak, zen dekam san ha asa karek san de tītī tan makan gwēblak? Sap kirekam bējen. Tītī tabin ola in sap aīrīs. Diki kareksa de gol gwen hap de sosonna men zen abon lwa gwek, zen zen tītī tabin ola insa ap lero gulbluk- asa dikim karek san dep tītī tan makan gwē gweblan hapye, hēndep dekon de

asa syauk blanak tak ta irin hip. Zep mes tangan dam gwesik: Titì tabin ola in sap aäris, hwëna kareksa de gol gwen hap de sosonna in, zen zen tangan nësa karek ta gwibirin.

¹⁴ Zen in zep, Musa mo titì tabin ola in sap aäris. Desa Alap zi hip golzimki, hen ëe ama sap enho en nakon sam gwesik gwibirin. Hwëna ëe de Kristussu eititi gwesibli kininkam, ano timni nama auhu-kama zi mo hole-hle enlala naban. Dekam hwëna kareksa de gol gwen hap de sosonna in etan karek san dep asa tik-tik ta gwenan- san de ëe zëbon de babu gwen zini kiye. ¹⁵ Ëe dekam ëre mo gwëna ama topse gwe-gwibirin. Sap men desan de ang gwen habë sap dwam gwe-gwenan, hwëna bëjënë desan ang gwen. Hwëna men desaë sap dwam gwibir srëm gwe-gwenan, zen hwëna desanë ein ang gwe-gwenan. ¹⁶ Zep ëe kimë anakan dam gulsuk gwenan, “Ëe an kareksaë gol gwenan,” dekam ëe hen ama sap anakan eiwa de gul gwenan, “Musa mo titì tabin ola in sap aäris- nësa de dawem san dep titì tabin hip dena.” ¹⁷ Zep Kristussu de eititi gweblankam, ëe aen homë karekna insa gol gwenan. Hwëna kareksa de gol gwen hap de sosonna in zen ano timnik lwa gwenan, zen zen asa tik-tik ta gwenan- dekam de zëno dwam gwibin sin ang gwen hapye. ¹⁸ Zep ëe kimë Kristus onakore sosonsa blol gwibir srëm gwe-gwenan, dekam zebë ënaka dam tasik gwenan, “Ano auhu-kama timni an, zëno sosonna hom-dawemsa dikim syal gwibin hipye. Ëe sap ama akasik gwenan, hwëna banakan dep?” Dekam

hwëna ëre mo dwam gwibin srëm sanë karek ensa syal gwe-gwibirin. ¹⁹ Dekam ëe ëre mo dwam gwibin sin banakan dep?– dawemsa de syal gwibin niye. Sap kië akasik gwenan, hwëna dekam ëre mo dwam gwibin srëm sanë karek ensa syal gwe-gwibirin. ²⁰ Zep ëe de kirekam ëre mo dwam gwibin srëm san syal gwe-gwibinkim, zen eirim homë syal gwe-gwibirin. Zen hwëna kareksa de gol gwen hap de sosonna men zen abon nama lwa gwenan, zen zen asa kire hap tik-tik ta gwenan, zebë kirekam ein syal gwe-gwibirin.

²¹ Zep ëe Kristussu de eititi gweblankam, ama anakan dam gulsuk gwenan: Dawemsa de syal gwibin hip sap de dwam gwibin, hwëna dekam kareksaë syal gwe-gwibirin. ²² Hwëna ano enhona man tangan sap Alap onakore titi tabin ola in san de ang gwen hap syal-syal gwe-gwenda. ²³ Hwëna Kristus onakore sosonsa de blol gwibin srëmkam, dekam zep hwëna kareksa de gol gwen hap de sosen naban ilman në gwenan. Hwëna kareksa de gol gwen hap dinik zep sosen gwe-gwenan, hëndep zëbon de babu gwen makan zebë gwë gwenan. ²⁴⁻²⁵ Zep Kristussu de eititi gweblankam, dekam ama ënaka anakan dam tasik gwenan: Ano enlalana sap ki– Alap onakore titi tabin sin de ang gwe-gwen hap denaye. Hwëna auhu-kama hole-hlena hen ki ano timnik deban zep ilman në gwenan. Ëe zebë hwëna ëre mo dwam gwibin srëm san karekna gol tine gwenan. Zen in zebë ënaka topse gwe-gweblanan, “Ëe makare zi karekna,

juwen ora san de ang gwe-gwenna, nara sa asa zeser sonera?– kareksa de gol gwen hap de soson nakonye.” Hwëna ëe ama dawemsa Alap hap gol gweblanan! Sap Zen mes Kristus Yesussu zer soneka– asa de Zen kareksa de gol gwen hap de sosonna in kon zeser sonen hapye!

8

Mae hap de ol: Nen kareksa de gol gwen hap de soson nakon mese Alap mo Enho mo sosonkam wet so gwek.

¹ Zep angkam nen men zene Kristus hun ëraha-en gwe'an, Alap molya nësa anakan gu-biridaka, “Zen an kareknak de kang gun hup dena.” ² Sap Kristus hun kime ëraha-en gwek, dekam zep Alap mo Enho mo sosonna nësa kareksa de gol gwen hap de soson nakon gwiswe soneka– men zen sap juwen ora san dep nësa titi ta gwibikye. Zep Alap mo Enhona in mes nësa li ta sonebirki, nen zep esa hëndep ëngaya gwer. ³ Zep mensa sap menkam nen alp ei gwibik, Musa mo titi tabin ol san de ang tankam de Alap mo nwenak ëdakastin hip dena, hwëna angkam mes desa Alap Zën nëbe mae hap syal gwibirzimki. Sap menkam nësa auhu-kama tim mo hole-hle tru-tru gul gwizimk. Zen in zep hëndep Alap zëre mo Tane tanganna auhu-kama zi mo timkim zer sone zaka– Zen de kareksa de gol gwen hap de sosonna insa te-lidak sonnakk de tinkim timbwas gun hup. ⁴ Zen mae hap ki Alap kirekam syal gwibirki: Mensa sap Musa mo titi tabin ol san de ang tankam alp ei gwibikke, Alap

mo dwam gwibin sin dikim sap ang tan hap, hwëna angkam desa zëre mo Enho mo sosonkam esa syal ei gwibir. Sap nen angkam mese kareksa de gol gwen hap de hole-hlena in kon ëhil gwe hanal.

⁵ Sap men zen auhu-kama zi mo hole-hle san ang ta gwenan, zëno mae mo enlalana nama kareksa de gol gwen hap de sosonna bi gwebla'an. Hwëna men zen Alap mo Enho naban nërgwë gwe'an, zëno mae mo enlalana man Alap mo Enho mo dwam gwibin sin dep liwehe gwenda. ⁶ Nëno enlalasa de auhu-kama enlala hole-hle bi gweblankam, dekam juwen ora sane ang ta gwenan. Hwëna Alap mo Enho de bi gweblankam, dekam nen mese Alap han ërumlae gwer, hen dekam ëngaya gwen hap de ora sane ang ta'an. ⁷ Eiwa, auhu-kama enlala en de nësa bi gwibiridankam, dekam nen eiwa Alap mo jal zikime ënwe-mase gwe-gwenan. Sap auhu-kama enlala hole-hle san de ang ta gwen zini, zen toton bëjen Alap mo titi tabin sin ang tan. ⁸ Hen zen bëjen Alap mo nwenak ëdakastin.

⁹ Hwëna Kristen zini emsa hom auhu-kama enlala hole-hlena bi gwibirida'an. Em de eiwa Alap mo Enho naban zergwënkam, ki eiwa emsa Alap mo Enho bi gwibirida'ara. Sap men nara Alap mo Enho naban zergwën srëmna, ki zen hom nama Kristen gwe'ara. ¹⁰ Hwëna Kristus de kirekam eno enhonak gwënkam, eno karek gol gwen timni in sap sa til. Hwëna eno angna sa ngaya gwera, sap zen mes Kristus onakon Alap mo nwenak dakastilki. ¹¹ Zen in zep, nëno mae mo timni an eiwa juwen hap dena. Hwëna Alap

mo Enhona, men Zen Kristussu t̄in n̄ikon ngaya taka, Zen de hen eno enhonak gw̄enkam, ki emsa sa hen Zen tim ēse naban ngaya tala.

¹² Zen in zep, aya-wal oso-wal, auhu-kama hole-hlena in n̄esa angkam hom tik-tik ta gwibi'in. Zep nen ba hap de z̄eno dwam gwibin sin ang ta gwen hap? ¹³ Em de z̄eno emsa de t̄it̄i tabin sin nama ang ta tine gwenkam, ki em etan juwen ora sane ang ta'an. Hw̄ena Alap mo Enho mo sostonkame desa anakare enlala naban baes eibi'ik, "Ano auhu-kama zi mo hole-hlena in mes Yesus golt̄ilk̄i," ki esa ēngaya gwer. ¹⁴ Sap t̄ingan men zene Alap mo Enho mo t̄it̄i tabin sin ang ta gwe'an, nen eiwa Alap mo hanan tabin walas!

¹⁵ Zep nen ansa Alap mo Enho naban ērgw̄e gwe'an, nen bap nen zi hon de ēbabu gwen zi mo kim Alapsa anakan āir̄i gweblan, "Asa sa husus gweblankam wet son hap gublula." Sap Alap z̄ere mo Enho mes n̄esa z̄ere mo walas hap li ta sonebirki. Zen in zebe Alap Z̄enaka enho nakon kwasang tola ban en gwebla'an "Ano Bian"kam. Nen zebe hen anakan dam ulsuk gwenan, "Alap mo walasna nen ba hap de āir̄iblan hap." ¹⁶ Sap angkam Alap mo Enhona anakan enhonak n̄esa gubirida'ara, "Em in eiwa ēre mo walas." ¹⁷ Hen sap nen angkam z̄ere mo walaskame lowehe gwe'an, zep nen esa lamkam dawemna apdekam bi eibir- mensa z̄ere mo walas hap lam gulzim'iraye. Desa Kristus mae han esa apdekam bi eibir. Sap mes dam gwesinin: Nen de Kristus hup de jal hap kareksa goltowe gwenkam, ki dawemna hen esa z̄eno kim lamkam oltower.

Mae hap de ol: Nen eiwa Alap mo ngatannak esa hëndep denaban lowehe gwer.

¹⁸ Hwëna karekna mensa angkam oltowe gwe'an, ano dam gulsunkum, zen mam naka hom- nen de anakan ëenlala gwe-gwenkamye, "Ëe Alap mo walaskam dena, asa sa Zën lamkam zëre mo ngatannak hëndep denaban golëlowehe gwera- san de teipsin-teipsinni kiye." ¹⁹ Hwëna nësa de ngatanna iwe golëbiti gwen hap de yakla yala insa, nen en home ës gwebla'an. Tïngare okamana awe de kirekam-kirekamna man tangan yaklana insa nës gwebla'an- sap otwerankam dena, hen sap te maekam dena. ²⁰ Sap tïngare okamana ansa Alap mes heip gulku- in kim Adam ne Hawa ne kareknak anyankke. Zen in zep hen okamana awe de tïngare kirekam-kirekamna zëre mae mo dwam gwibin srëm san karekna noltowe gwenan- sap te, sap otweran. ²¹ Hen zen zep yakla yala insa angkam nës gwebla'an- dekam de hen desa gwiswe sonen hap, sap juwe gwen nakon hen ëbatre gwen mae nakon, in kim de Alap mo walas naban apdekam zëre mo ngatannak lowehe gwe'akye.

²² Nen tawana, tïngare Alap mo yang tabin kire-kirena angkam man sang-sangna sërkam neis gwibi'in- men kiye, we de jaha gwen hap eisbir anenna. ²³ Hen zen en hom neis gwibi'in, hwëna Kristen zini nen hen ema en-honak anakan sërkam eis gwibi'in, "Diki Alap mo yaklana in nabakam zen hatan!" Sap nen Alap mo dawem golzimdinni, nonol okamanak

dep dena mese ulink- in sa zère mo Enhona nèbe mae hap ing ta sonezimkiye. Hwëna angkam namae hen sang-sangna in sa eis gwibi'in. Zen in zebe yaklana in sa isrip-sri enlala naban kara ë gweblanan, sap zen dekam tangan esa Alap zère mo walas hap de hamal gulzimdinni in sa bi eibir. Zen dekam sa nëno mae mo auhu-kama tim karekna in sa tim ëse hap li ta sonebiri. ²⁴ Men de kame ëKristen gwëk, zen hëndep dekon zebe yaklana in sa de anakan kara gweblanna ëkon gwesik hanak, "Nen Alap mo walasna tim ëse naban esa hë'ho gwibin langnak lowehe gwer." Zep hëndep angkam nama kirekame kara ei gwibi'in. Yaklana in de hatankam, zen dekam esa ëkara gwe-gwenna in sa ëzausul. Sap dekam etan basa dep?- kara gwe-gwibin niye! ²⁵ Hwëna nama de kara gweblannak, dekam nama esa enlala tatete naban ëkara gwe-gwer- anakare enlala naban, "Sap sa holo gwer, hwëna diki ëe gul irin."

²⁶ Nen kim nama embwan naban yaklana in sa ës gwebla'an hen ba maesa de tahalha gwibinni, dekam Alap mo Enhona man nësa mas gwibirida gwenda. Sap nen home anakan dam ulsuk gwenan, "Ëe kirekam asa Alapsa abe tal." Hwëna nama de abe tan srëmnak Alap mo Enhona dekam zep Zën nëno mae mo enhonak de abena in sa sërkam de embwan naban Alap zère hon golhata gwenda. ²⁷ Zen dekam Alap zère mo dwam gwibin en san nèbe mae hap abe ta gwenda. Hen Alap, men zen tïngare zi mo enhona tame ta gwizimnira, Zen man zère mo Enho mo nèbe mae hap de embwan nabare

abena dokwak gul gwenda.

²⁸ Zep angkam mese tangan anakan tame ul: Nen mensa oltowe gwenan, dawemna ahaksa karekna, Alap hwëna desa dawem en hap nëbe mae hap li yul sone gwizimnira- nësa men desa Zëna kwang guludakake, hen Zënaka men zene embwan ë gweblananke. ²⁹ Sap Alap zëre mo hlil irin wenya nësa orep mes tame tabirki, hëndep nësa zep hamal hap kalang gwibiridaka- nen dikim zëre mo Tanena Yesus makan ëliwehen hapye. Hëndep lamkam Yesus Zën sa nësa golëlowehe gwera- san de nonol wë tan walas de oso wal zeban golëlowehe gwenna kiye. ³⁰ Zep Alap eiwa orep mes nësa hlil inki, zep nësa kwang guludaka. Zen in zep zëre mo kwang guludan wenya nëbe mae hap syal gwibir-zimki-dekam de zëre mo nwenak ëdakastin hïp de-naye. Zep nen eiwa esa zëre mo ngatannak yaing gwer.

Mae hap de ol: Toton banakan molya Alap mo kwasang nakon nësa kap nulsuk.

³¹ Zep Alap insa kirekam nëp syal gwibir-zimki, nen banakarekam esa enlala eibir? A kirekam esa: Alap de nësa kwasang gwibiri-dankam, toton nara molya nësa dot sobiridaka. ³² Sap Alap Tane zemka hom anakan kwasang gweblaka, “Bap Zen karekna goltowen.” Hwëna nëbe mae hap de dawem hap sosok taka. Zep Zen banakan molya nëbe mae hap de hamal gulzimdinni insa sul sonezim srëm gweka. ³³ Zep Alap mo hlil irin wenya nësa toton nara molya anakan gubiridaka, “Zen an kareknak de kang

gun hup dena.” Ki san ha Alap Zëna maka kirekam nësa gubirida'ara? Zen bëjen! Sap Zen Zen nëbe mae hap syal gwibir-zimki- nen dikim zëre mo nwenak ëdakastin hip denaye. ³⁴ San ha ahakon hen ki?- nësa de anakan gubiridan hap denaye, “Zen an kareknak de kang gun hup dena.” San ha Kristus Zëna maka kirekam nësa gubirida'ara? Bëjen! Sap Zen Zen nëbe mae hap tilki, hen nëbe mae hap tin nikon ngaya gweka. Hen Zen Zen angkam Alap mo dam taha nakon teipsin tangankam nikin'ira- men dekon nëbe mae hap Alapsa abe ta gwe'araye. Zep Zen bëjen nësa karek tabin hip gubiridan. ³⁵ Zep Kristus mo kwasang nakon, nara maka nësa kap gulsu'ura? San ha nen de kareksa goltowe gwenkam zëno dam gulsunnu?- “Kristus hom nësa kwasang gwibirida'ara.” Kirekam bëjen. Zi de nësa Yesus hup de jal hap karek ta gwibinkim, dekam hen bëjen kirekam dam gulsun- ahaksa tahalha yawalsa de goltowenkam, ahaksa usak yawal, hen lang de sërkam bot-bot gwen, ahaksa tin hip de alp gwesin. Sap sa hen nësa damera gwer. Hwëna kitak desa de goltowe gwenkam, dekam hen anakan bëjen dam gulsun, “Kristus hom nësa kwasang gwibirida'ara.” ³⁶ Eiwa, nen Kristen zini kirekam de kareksae oltowe gwenan. Zen in zep Alap mo olak zini Alapsa anakan gubluka,

“Ëe yakla jamkamë ere mo bose hap jalom ëk tihinak lowehe gwenan.

Ëe an san de domba zahona kiye- tamera gwen

en hap dena.”*

³⁷ Eiwa, sap nen kareksae kirekam oltowe gwenan, hwëna Kristus, men Zen nësa kwasang gwibiridaka, zëno sostonkame tatem tangan ëzauk gwenan. ³⁸ Sap ëe ama tangan taïbli'an: Nësa toton nara molya kap gulsuku- Kristus mo kwasang nakonye. Sap nen de juwenkam ahaksa nama de ngaya nik lowe henkam, Zen nama nësa kwasang gwibirida'ara. Alap mo dam taha nakore zini bëjen nësa zëno kwasang nakon kap gulsun. Dowal-dowala hen bëjen. Nen sap esa angkam karekna oltowe gwer- hen lamkam mae. Hen dowal mo kigina sap sa nësa karek ta gwibiri. Hwëna Alap mo nëbe mae hap de kwasangna molya dekam tap gwek. ³⁹ Sap Alap mo tingare yang tabin nikon, sap ngli bolak de lowehen wenyha hen hi mwanak de lowehen wenyha, zen toton bëjen nësa Alap mo kwasang nakon kap gulsun. Sap Alap mes Bian Kristus Yesus onakon sërkam zëre mo kwasangna nëbe mae hap goltreizimki.

9

Mae hap de ol: Yahudi zini, zen sap Alap mo hlil irin zi, hwëna zen hom kitak Yesussu daïbli'bla'an.

¹ Èe an Kristus zëre mo nwenakë eiwa tangan naka emsa gubirida'an, hen Alap mo Enho naban ëre mo enho naban man asa anakan trï la se'ara, “Èe eiwa homë emsa boton tabi'in.” ² Èe ama sërkam enho nakon dowe hana gwenan,

* **8:36** 8:36 Mzm. 44:23

³ sap ëre mo ausu nakore zini, Yahudi, zen hom beyakam Kristussu daïblibla'an. Zep Kristus dikire asa hla tak, ëe de emsa boton tabinkimye: Ëe eiwa amaka syauk blanak ënaka drëne se'an-hëndep denaban dikim Kristus onakon langa gwen hapye, ëre mo ausu nakore zini insa dikim ngaya tabin hipye. ⁴ Zen sap Alap mo hlil irin zi-Israel Bak mo auyan-tane wal, mensa sap nonol Alap zëre mo hanan tabin walaskam gubirida gwékake. Sap Alap nonol zëre mo ngatan zi mo lang nakore ngatanna zëbe mae hap goltrei gwizimki.* Hen Alap mo nonol zi niban de ol ziaha-en gunnu, zen dokwak nul gwék.* Hëndep zao kim lwa se'ak, Musa Bak dekam zep hen titi tabin ola insa ayang gulzimki. Sap Alap nonol zëbe mae en hap anakan goltreizimki, "Syala an desa em gol gwen- Asa dikim blikip gwesik gweblan hapye." Hen nonol tangan zëbe mae hap zëre mo gu-gubiridan ola gol gwizimki.†
⁵ Zëno mae mo auyan-azana Abraham, Isak, hen Jakob mae man tangan sap Alap mo nwenak ëdakastik, hëndep Israelsa de ngaya tabin hip de Zini, auhu-kama zi mo enlala gweblankam, zëno mae mo ausu nakon saltilkï. Zep zen ba hap daïblibla srëm gwe'an?

Sap eiwa dena, Kristus Zen hen Alap. Hen Zen kitak teipsibirida'ara- hëndep denaban. In eiwa

* **9:4** 9:4 Kel. 16:10; 33:22; 40:34; 1Raj. 8:10-11 * **9:4** 9:4 Alap zini an han olsa ziaha-en gul gweka: Nuh (Kej. 9:9), Abraham (Kej. 17:2), Musa (Kel. 24:8), hen Daud (2Sam. 23:5). † **9:4** 9:4 Israelsa de ngaya tabin hip de Zi hip dena kim nonol damkam gu-gubiridaka, zen Ul. 18:14-20nak lwa'an.

tangan!

Mae hap de ol: Alap mo hanan tabin walasnak de bitī gwen hap dena, zen kitak Alap mo dam tasibin nikon.

⁶ Hwēna anakan bahem ēenlala gwe-gwen, “Alap mensa Israelk de zini gu-gubirida gweka, zēre mo hanan tabin walas mo kim de lamkam golēlowehe gwen hap dena, Zen molya desa zēbe mae hap golzimki, sap zen mes Kristusu de taīblīblan hap baes tak.” Kirekam bējen. Hwēna ansa emki enlala gwibin: Kitak mensa auhu-kama zi mo wei-wik gun nukon Yahudikam nenbirida gwenan, hwēna Alap mo nwenak zen kitak Yahudi tangansa hom. ⁷ Hen kirekam, auhu-kama zi mo aītbankim, Abraham mo auyan-tane walkam de gubiridanna, zen hom kitak Alap mo aītbankim Abraham mo auyan-tane walyak bitī gwe'an. Sap Alap anakan Abrahamsa gubluka,

“Eno auyan-tanena, zen Isak onakon sa naitbir song gwer.”*

⁸ Zep zēno dam gulsunnu, Abraham mo tīngare auyan-tane walya, zen hom Alap mo nwenak Abraham mo auyan-tane walkam ēnwe-mase gwe'an. Hwēna ēe Yahudi zini ama ēkīl gīl gwenan, “Ēe an tīngan Abraham mo auyan-tane wal, zep ēe kitak Alap mo hanan tabin walas.” Hwēna diki Alap mensa zēre mo hanan tabin walasnak de bitī gwen hap gubirida'ara, zen zen en bitī gwe'an- men kirekam hen Abraham mo

* **9:7** 9:7 Kej. 21:12

tanena Isaksa dam tasikike. ⁹ Sap Alap anakan Abrahamsa gu-gubluka,

“Ngein sin de tahunkam Ee asa lwa halzal, dekam walas naban asa Sara Baksa hlaulzul.”*

¹⁰ Walasna insa gu-gubluka, zen ano mae mo auyanna Isak Baksa. Zëna zini Ismael, zen hom Alap mo gu-gublunnak ti'ira. Zep Yahudi zini angkam, zen sap kitak Isak Bak mo auyan-aza nakorena, hwëna ahakore en nik Alap mo dam tasibin nik bitï gwe'an. Ahakon hwëna Ismael Bak mo kim ëgwei kinï'an.

Hwëna Isak Bak kim Ripka Baksa golka, zen zep zi walasna dan-dan wë sok. ¹¹⁻¹² Hwëna walas ën srëmnak, Alap mes Ripka Baksa hamal hap anakan gu-gubirki, “Em desa zi walas darena wë so'anka, oso zik mo auyan-tane walya, zen zen sa ëteipsil. Hwëna aya zik mo dena, zen zëno mae mo tana iltikinnik sa lowehe gwer.” Zep Alap man nen dikim anakan dam gulsun hup dwam gweka, “Zen zëre mo kalang gwen san dawemna zi hip gol gwizimnira, hen sap karekna. Zi mo dawem nakon hom gol gwizimnira.” Sap Ripka in kim Alap mo ola insa sane gwek, ungalanak de walas darena in hom banakare karek maena syal eibirki. ¹³ Zep Alap mo olak zëno walas darena in hap dena anakan lwak,

“Ee asa Yakobsa kwasang gwe-gweblal. Esausa asa husus gwe-gweblal.”*

¹⁴ Zep angkam dam gulsunnu banakan? San ha Alap man karek gweka?– kirekam zep ba

* **9:9** 9:9 Kej. 18:10,14 * **9:13** 9:13 Mal. 1:2-3

maesa de syal eibin srëmnak kles sokaye. Sap diki Alap bëjen karek gwen! ¹⁵ Hwëna Zen insa kirekam hamal hap gu-guzimki, zen man hen dakasti'in- men kirekam hen Musa Baksa gublukaye,

“Aen asa ëre mo dwam gwibin sin dam tasik gwibir- men desaë kwasang gwibirida'akye. Hen dawemsa de gol gwizimdin hip de wenyä, zen hen Aen asa dam tasik gwibir.”*

¹⁶ Zep Alap mo hlil irinnik de bitï gwen hap dena, zen zi nëre mae mo dwam gwibin sin hom, hen zen zi nëre mae mo syal gwibinkim bëjen. Zen diki Alap zëre mo kwasang-kwasang en nakon- men desa en Zëna dam tasibirkike. ¹⁷ Zen in zep hen Mesir mo teipsin zi hip dena Alap mo olak anakan lwak,

“Ëe mae en habë emsa Mesirsi de irik gin hip dam tasik: Dekam de tïngare okamanak de zi ano sosonsa tame gun hup. Ëe kimë emsa de karek tan hap de owasna syal gwe-gwibi'ik, zen dekam sa tïngare okamanak de zini Asa tawa nëblandal.”*

¹⁸ Zep man dam gwesinïn: Men desa Alap dam tasik gwibirida, Zen desa en kwasang gwibirida gwenda. Hen men desa Mesir mo teipsin zini in mo kim dam tasik gwibirida, zëbe mae hap ënol drak-drak gwen hap denaka gol gwizimnira.

¹⁹ Zep em ahakon anakan esa asa lakensiblil, “Ki Alap ba hap de zini ënol drak-drak gwen hap karek tabin hip?- sap Zen Zën am kirekam de ënol drak-drak gwen hap gubiridaka! Hen

* **9:15** 9:15 Kel. 33:19 * **9:17** 9:17 Kel. 9:16; 11:9-10

zini nen bëjen jalse gweblan!” ²⁰ Hwëna bahem kirekam Alapsa gublun! Sap em in zëno yang tabin nikake! Zep em ba hap de zëno kareksa hlaulblun hap? San ha yuna maka?- men zen ik guk, desa gubi'in, “Em bap asa yu hap ik gulku? Diki blome hap emaka.” † ²¹ Men zen ik guk, san ha zënoka hom?- anakan de kles son hap, “An yu hap asa ik gul- mwin-mwankam de wei yul gwen hap. Ahana an blome tol hap asa ik gul.”

²² Zep zen Alap zëre mokake- kirekam de nësa klis gun hup denaye, dekam de zi lamkam zëre mo sërkam de sosen naban jala ban tame son hapye. Hwëna Zen na-en hom desa zitreizim'ira. Hwëna nonol, men desa kareknak de kang gun hup hamal gulku, Zen desa nwe enkam de holokam kara ta gwibin hip dwam gwibirida'ara. Hyanak sa hwëna sërkam karek tabiri. ²³ Hen kirekam, kwasang gwibiridan hap dena mensa nësa hamal gulku, nësa sap sa hen holokam kara ta gwibiri- dekam de lamkam zëre mo ngatansa mam tangankam gol gwizimdin hip, ²⁴ men desa kiresa de golzimdin hip kalang gwibiridaka hëndep kwang guludaka, sap Yahudi zi, sap Yahudi srëm zi. ²⁵ Sap Yahudi srëm zi hip dena, Hosea Bak man Alap mo ola anakan ayang gulzimki,

“Men zen ano hlil irin zinik bitì gwe srëm gwek, hwëna angkam Èe asa desa hen gubiridal, ‘Em in hen ano hlil irin wanya.’

† **9:20** 9:20 Yes. 29:16; 45:9 Blome hen yu hap dena, Paulus kama ngatdarak nakore syal gwibin kire-kire hap ale gulku, hwëna enlalana apdenak- men kirekam Orya ol zini yu-blomena syal nei gwibirinke.

Men desaë menkam kwasang gwibirda srëm gwek,

hwëna Èe asa angkam kwasang gwibirdal.

²⁶ È-ënak de zini men desaë gubiridak, 'Zen in ano hlil irin zisi hom,'

hwëna desa Èe asa gubiridal, 'Em in Ngaya Zini Alap ère mo walas tangan.' ”*

²⁷ Hwëna Yahudi zi hip dena, Yesaya Bak anakan Alap mo ola tenggwaran naban ayang gulku, "Sap eiwa, Israel Bak mo ausu nakore zini zëno beyana san de hinak de hisglimni kiye,

hwëna da-en tangan sa ëngaya gwer.

²⁸ Sap Bian Alap nabakam sa okamana ansa olo gulu.”*

²⁹ Etan Yahudi zi hip Yesaya Bak man ale gulku, "Soson Zini Bian Alap de nësa anakan gubiridan srëmkam, 'Dikire da-en ëngaya gwek,' ki emaka kïtak tangan ëna Sodom hen Gomorak de zi mo kim juwek.”*

Mae hap de ol: Yahudi zini hom Alap zëre onak dikim ëdakastin hip de ora ësena dam dasi'in.

³⁰ Zep nen banakarekam esa Alap mo ola insa srip ulsul? A kirekam esa: Yahudi srëm zini, zen sap hom Alapsa dë gweblak. Zen hwëna Alapsa de taïblïblan nakon ki zëre mo nwenak ëdakasti'in- Kristus hup de ol dawemna insa kim daïblï gwibi'inke. ³¹ Hwëna Yahudi zini, zen sërkam sap zëre mae mo sosonkam Musa mo titi tabin ol san de ang tankam alp nei gwibirin-

* **9:26** 9:26 Hos. 1:10; 2:22-23

* **9:28** 9:28 Yes. 10:22-23

* **9:29** 9:29 Yes. 1:9

dekam de Alap mo nwenak ëdakastin hipye. Hwëna waba tolkam! ³² Ba hap waba hap? Zen sap zëre mae mo ssonkam ëalp gwe-gwenan-hwëna Alapsa de taïbliëlan srëmkam. Zen in zep gol tenya iwe de tanasa tang ta zankam altil gwenan- ³³ men kirekam Alap mo olak lwakke, “Ëe ama gol te dawemna Yerusalemk ngirinnik ik gi'in, zi deka zëwe tana bol tang ta gwe zankam ëaltil gwëk. Zen zep sa gol tenya insa husus nei gwibir. Hwëna men zen de gol tenya insa daïbli gwibi'ik, zen molya anakan ëenlala gwe-gwëk, ‘Ëe an waba habë taïlibik.’ ”§

10

¹ Zep aya-wal oso-wal, ëe ama tangan dwam gwe'an- ano zi ausu nakore zini kitak de sap ëngaya gwen hap. Zen in zebë enlala zon tasiblin naban Alapsa aberbe ta tine gwenan. ² Ëe eiwa denakaë emsa gubirida'an: Yahudi zini in sap eiwa Alap mo syal hap syal-syal tanganna. Hwëna zëno mae mo syala in, men kirekam angkam Alap goltreizim'ira, zen diki desan maka

§ 9:33 9:33 Paulus man Yerusalem mo aha bosena “Sion”kam ale gulku. Paulus man Yesaya 28:16na awe ale gulku, hen zen man Yes. 8:14 naban siri gulku. Yesaya Bak “kaso moko”kam ale gulku, sap Yahudi zini kasokam gola dauk gweblak. Hwëna Orya ol zi hip, ngirin gol tenya ban enlalana man anakan apde nek, “Bol-zaun tangan wenya.” Zep “gol te”kam li nul sonek. Ngirin gol tenya insa de dam gulsunnu, Zen Kristus.

ang ta'an. ³ Sap zen hom Alap zère onak dikim ëdakastin hip de ora ësena dam dasi'in. Zen hwëna zère mae mo enlala san ëpba titi tabin ol enna insa kyang-kyang nulsuk tine gwenan. Zen in zep Alap mo ora ëse zertreizimdin sin de ang tan hap baes ta gwe'an. ⁴ Sap Kristus mes nëbe mae hap Musa mo titi tabin ola insa sul sonezimki. Zep tingan men zene angkam Kristus ensa laiblibla'an, zen dekam zebe Alap mo nwenak ëdakasti'in- titi tabin ola insa de enlala gwibin srëmkam.

Mae hap de ol: Tingare zi ausu nakore zini, men zen en de Kristussu daiblibla'ak, zen zen sa ëngaya gwer.

⁵ Hwëna Alap mo nwenak de ëdakastin hip dena Musa mo olak man lwak,

“Men zen de ano titi tabin ola an san sul sonenkam ang ta gwe'ak, zen zen en sa hëndep denaban ëngaya gwer.”*

⁶⁻⁷ Hwëna Alap mo olak, Zënaka de taibliblankam de zère mo nwenak ëdakastin hip dena man hen lwak,

“Em home auhu-kama tim niban de ngatan zi mo lang san de tëblan hap ëdwam gwe'an.

Hen juwen zi mo lang san de tëblan hap hen home ëdwam gwe'an.”*

Alap mo olak de gulk sun ol blaoranna in mo dam gulsunnu a kirekam moye: Em home ëdwam gwe'an- Kristus de ngatan zi mo lang nakon zerati gwezan hap, ahaksa juwen zi mo lang nakon de zerta gwe sezan hap, Zen

* **10:5** 10:5 Im. 18:5 * **10:6-7** 10:6-7 Ul. 30:11-13

dikim ëngaya gwen hap emsa mas gwibiridan hapye. Sap Kristus ebon mae onakon langanak hom. ⁸ Sap em dikim ëngaya gwen hap dena, zen Kristussu de taïbliblan en nakon- ëe men kirekamë ol dawemna ol halada gwenanke. Zen zep Alap mo olak anakan lwak,

“Ol dawemna in, ba hap de langa san teibin hip? Zen ere mae mo ëk tihinak hen enhonak am lwa'an.”*

⁹ Sap em de ere mo enho nakore taïbliblanna insa zi mo inik anakan kira gunnu, “Yesus Zen ano Teipsinnï,” hen enho nakon de anakan taïbliblanna, “Desa eiwa mes Alap tïn nikon ngaya taka,” ki em hen esa ngaya gwer. ¹⁰ Sap em de enho nakon taïblibblankam, dekam em mese Alap mo nwenak dakastilida. Hen ere mo taïbliblanna insa de zi mo inik kira gunnu, dekam em mese ngaya gwenda. ¹¹ Sap Alap mo olak man lwak,

“Men zen de Biansa daïbli gwebla'ak, zen molya anakan ëenlala gwe-gwek, ‘Ëe an waba habë taïbliblak.’ ”*

¹² Alap mo kirekam de gu-gubiridanna in, zen kitak de zi hip dena- sap Yahudi zi, sap hen Yahudi srëm zi. Sap zëno mae mo Bianna aha-en, hen men zen Desa abe da gwenan, zëbe mae hap man dawemna mamkam gol gwizimnira. ¹³ Sap Alap mo olak anakan lwak,

“Men zen Biansa anakan abe da'ak, ‘Asa em ngaya tan,’ zen zen sa ëngaya gwer.”*

* **10:8** 10:8 Ul. 30:14 * **10:11** 10:11 Yes. 28:16 * **10:13** 10:13 Yl. 2:32

14 Hwëna zini banakan sa abe da gwer?- zen de nama taibliblan srëmkamye. Hen banakan sa daibli gweblal?- zen de nama zëbe hap denaka ësane gwen srëmkamye. Hen zen banakan sa zëbe hap dena ësane gwe-gwer?- zi de tonbiri-dan srëmkamye. 15 Hen zini banakan sa ol dawemna insa zëbon mae osan dep nolsong gwe-gwer?- Alap de zisi zëbon mae osan dep lup gul sonen srëmkamye. Zen zep Alap mo olak anakan lwak,

“Zini men zen Alap mo ol dawemna golhata zanna, zen isrip-sri gweblan tanganna.”*

16 Hwëna ol dawemna insa nolhalada gwenan tïngare zini hom dokwak nul gwenan. Sërkam tangan Yahudi zi. Sap zen kire hap dena Yesaya Bak mo olak man dakasti'in anakan in zen lwak,

“Bian, ëe insa eno ola ayang gul gwenan, hom dokwak nul gwenan.”*

17 Sap Kristussu men zen daibli gwebla'an, zen diki men zen zëbe hap de ol dawemna insa ësane gwe-gwenanke. 18 Hwëna Yahudi zi de ësane gwen hap dena banakarekam Alap mo olak lwak? San zen maka anakan ëgu gwe'an?-

“Alap, bahem asa karek tan, sap ëe homë ol dawemna insa sak.” Hwëna zen diki zen maka enlala hohle tan naban lowehe gwe'an, sap Alap mo olak anakan am lwak,

“Alap de kitak yang tabin hip de ola mes tïngan ëtawa gwendal.

Sap keis maesa de hlauludankam zen dekam maka Alapsa tame da'an.”*

* **10:15** 10:15 Yes. 52:7; Nah. 1:1 * **10:16** 10:16 Yes. 53:1

* **10:18** 10:18 Mzm. 19:5

Kirekam de dam gulsunkum, ki zen maka hen Alap mo Kristus hup de hamal hap de ola in sa dawemkam daïblïbik. ¹⁹ Hwëna san ha Yahudi zini Kristus hup de ol dawemna hom yap tame nu'in? Zen diki nonol zen maka tame nuk, sap nonol tangan Musa Bak zëbe mae hap Alap mo ola anakan ayang gulzimki,

“Ëe asa syal gwibir- em dikim Yahudi srëm zisi sisngïn gwibirida gwen hap denaye, sap Ëe asa zëbe mae hap dawemsa golzim. Hëndep em esa Asa de tame tan srëm zi ausuna in sa jal eibirida gwer.”*

²⁰ Hen Musa mo hyanak etan Alap mo ola ansa Yesaya Bak Yahudi srëm zi hip dena damnak anakan ayang gulzimki, “Zi ausuna men zen Asa dëbla srëm gwëk, zen sa hwëna Asa dam dasil. Hen men zen Asa tame da srëm gwëk, Ëe asa zëbe mae hap Ënaka zertreizim.”*

²¹ Hwëna Yahudi zini abe mae hap dena Yesaya Bak sap anakan ayang gulku, “Ëe holo tangankamë sap ëre mo tahana Yahudi zisi de haen gwibiridan hap inïn sosuk tine gwëk, hwëna nol drak-drak zi ausuna in hom mae Asa nasalblak.”*

11

Mae hap de ol: Alap mo kalangna ki- Yahudi zi hip de etan dawemsa golzimdin hip denaye.

* **10:19** 10:19 Ul. 32:21
10:21 Yes. 65:2

* **10:20** 10:20 Yes. 65:1

* **10:21**

¹ Zep san ha Alap eiwa mes zère mo nonol hlil irin zi ausuna Yahudisa gweibirida kinika? Sap kirekam bëjen. Ëe dwan hen dekore wal syake- Abraham Bak mo auyan-tane ahana. Ëe an hen Benyamin Bak mo ausu nakon de saltin nikake. ² Alap bëjen ano ausu nakore zini insa gweibirida kinin- mensa sap nonol hlil inkiye. Em san ema Alap mo ola ansa eititi eibi'in?- men kim Elia Bak Yahudi zi aususa de husus gwibiridan hap dena Alapsa tawa takaye:

³ “Bian, zen mes ere mo olsa de ayang gul gwen hap de zini damerasik. Hen ere hap de otweran tru tase gweblan kals maena mes dre dasibir. Ëe angkam ë-en tanganë gwë'an, hen asa angkam tan hap alp dasi'in.” *

⁴ Hen em wëhë enlala eibi'in?- Alap men kirekam ding gulblukaye. Zen man ding gulbluka,

“Em e-en home gwë'ara. Ëe mesë zini da-en, tuju ribu en tolkam, ëre onak dep dam tasibik- yang tasin alapna Ba'al Bak hap de bokle kom so gweblan srëm wenyaka.”*

⁵ Zep angkam hen kirekam. Alap mes da-en zère hap Yahudi zi ausu nakon dam tasibirki-

* **11:3** 11:3 Elia Bak kim Alap mo ola ayang gul gweka, dekam Israelk men zen teipsinkim irik gilki, bosena Ahab Bak. We zem bosena Izebel Bak. Zen yang tasin alapna Baal Bak osan dep sil libirhal gwek- hen aha yang tasibin dowal-dowal san dep. Israelk de zini zep hëndep eiwa de Alapsa hli da gwek, hen zëbe hap de otweran tru tase gweblan kals maena dre da gwibik. Ahakore weny men zen sap Alap mo olsa ayang nul gwizimk, desa hen man damerasik gwek. (1Raj. 19:10-14) * **11:4** 11:4 1Raj. 19:18

men zen Alap zère mo kwasang-kwasang nakon Kristussu de taibliblankam ëngaya gwe'anke.
 6 Hen man tangan dam gwesin: Zen de Alap mo kwasang-kwasang en nakon ëngaya gwe'ak, ki zen ba maena hom syal neibik- dekam de ëngaya gwen hap denaye. Sap zi zère mo syala kon de ëngaya gwenkam, desa bëjen anakan gubin, "Zen Alap mo kwasang-kwasang nakon ëngaya gwek."

7 Zen in zep Yahudi zi hip dena anakan lwa'an: Alap mo nwenak dikim ëdakastin hip dena mensa sap dei gwibik, hwëna beya nik hom hla nuk. Hwëna men desa en Alap nonol dam tasibirki, zen zen en hla nuk. Hwëna beya wenya kip, ënol drak-drak gwen hap denaka golzimki.
 8 Zen man dakasti'in- Alap mo olak men zen anakan lwakye,
 "Alap mes desa totokkam de truwen hap gubiri-daka.
 Hëndep angkam zëno mae mo nwena mes dïmin tabir-zimki,

hen ini mes mat tasibir-zimki."*

9 Hen Daud Bak kire zi hip anakan Biansa gubluka,

"Bian, dikire tahalha srëmkam lowehe gwek- Emsa dekakim hwëna eititi në gweblak.
 Hen dikire sowe henkam lowehe gwek- dekakim anakan tame nul srëm gwek, 'Ëe an juwen hap de ora sanë ang ta'an.'

10 Hen dikire zëno mae mo nwena ëdïmin gwek-dekakim ëkara gwe srëm gwe-gwek.

* 11:8 11:8 Ul. 29:4; Yes. 29:10

Dikire nihin dohon-hon naban hëndep denaban lowehe gwek.”*

¹¹⁻¹² Zep ahakon sa asa dakensiblil, “San ha Alap zère mo nonol hlil irin zini in hëndep denaban mes juwen orana in san ang tak?” Kirekam hen bëjen. Zen mae hap ki Alap zère mo nonol hlil irin zini, Yahudisa, kirekam gweibirida kinika: Dekam de zen Yahudi srëm zisi anakan hlauludan hap hen sisngin gwibiridan hap, “Zen en ba hap Alap onakore isrip-sri naban lowehe gwenan? Diki nen hen emaka Kristussu zëno mae mo kim laiblibla'an.” Zep angkam Yahudi srëm zi Alap mo kwasang-kwasangnak lowehe gwe'an, sap Yahudi zini man Kristussu de kirekam taibliblan hap baes ta'an. Hwëna lamkam kim de etan Alap kwang guluda'an- dekam de zen hen etan zère mo kwasang-kwasangnak kitak lowehen hap, zen dekam sa zen hen Kristussu daibliblal, hen zen dekam tangan sa tingare zi mo isrip-srina taman kinil, sap zen hen dekam sa Alap onakon hë'ho gwibin nika nulin gwer.

Mae hap de ol: Yahudi srëm zini men zen angkam ëngaya gwe'an, bap zen ëbolte-bolte gwe-gwen.

¹³ Hwëna ëe Yahudi srëm zini ebe mae habë ale gulzim'in, sap Alap mes asa dam tasiki-dekam de Yahudi srëm zini ebe mae hap ol dawemna ansa golzim halada gwen hap. Hwëna syala insa Alap abe hap wei yul soneblaka, ëe mae habë desa syal-syal gwe-gwibirin hen

* **11:10** 11:10 Mzm. 69:23-24

golluwe gwenan: ¹⁴ Sap ëe ama dwam gwe-gwe'an- ère mo zi ausu de emsa hlauludankam anakan sisngin gwibiridan hap, “Zen en ba hap Alap onakore isrip-sri naban lowehe gwenan. Hwëna nen home.” Kirekam zen hen maka dam nulsu'un, “Diki nen hen emaka Kristussu zëno mae mo kim laïblïbla'an.” Kirekam de lwankam, zen hen maka ëngaya gwe'an. ¹⁵ Sap Alap kim Yahudi zini baes gwibiridan makan gweibiridaka, dekam zep hwëna zëre han de zerumlae gwen hap de orana tïngare okamanak de aha zi ausu hap kles tyasizimki. Zep isrip-sri gwibin tangan nik sa lwal- Alap kim de Yahudi zi niban etan golëumlae gwe'ankaye. Dekam zen sa ënwe-mase gwer- san de juwen nakon de etan ëngaya gwenna kiye. ¹⁶ Eiwa, kirekam sa lwal, sap auyan-aza wal zem mes Alap mo nwenak ëdakastik. Zep hen auyan-tane wal zem an sa hen hëndep ëdakastil. † Sap Yahudi zini, zen Alap mo ik gin zaitun makan ënwe-mase gwe'an. Zaitunna in mo ausuna, zen Abraham mae. Zen man tangan Alap mo nwenak ëdakastik, zep hli-hlina in sa hen lamkam ëdakastil.

† **11:16** 11:16 Awe “auyan-tane wal zik de ëdakastin” hip dena, Paulus gulk sun de ol blaonzimdinni dan-dan ale soka: Ahana Alap hap de rotisa de syal gwibir-blin hap dena, ahana ik gin zaitun ausu hap dena. Roti mang-mang gunsu de akasibin hip ap gul irinni, zen de dërek gwenkam, ki kitak dërek enna. Zep mensa Paulus roti mang-mang gun hup dena ale gulku, zëno enlalana apdenak- ik gin zaitun hup de ola in hanye. Zen a kirekam moye: Yahudi mo auyan-azana Alap mo nwenak man ëdakastik, zep sa auyan-tane wal zem hen lamkam ëdakastil.

¹⁷ Hwëna Alap zëre mo ik gin zaitunna insa, ahakore hli-hlina mes blom gulsuku- zao de hwëna zën de saltin zaitun hli-hlisa zëno tihinak eiyas gil inen hap. Zen Yahudi srëm zini emsa kirekam eiyas gil ineka. Zep Alap mensa Abrahamasa walas zeban gu-gubiridaka, hë'ho gwibin nika de golzimdin hip dena, zen hwëna angkam eme mamkam ulin gwe'an. ¹⁸ Zep Yahudi srëm zini em bahem anakan ëbolte-bolte gwe-gwen, "Nonol hli-hlina mes Alap blom gulsuku, hwëna asa zë eiyas gil ineka." Emki anakan ëenlala gwe-gwen, "Ëe an dwan hli-hli en nakake. Ëe ausu naka hom." ¹⁹ Hwëna em emaka asa ding ulbli'an, "Sap eiwa. Hwëna Alap mes nonol hli-hlina insa blom gulsuku, zao zep hwëna asa zëno tihinak eiyas gil ineka." ²⁰ In sap eiwa kirekam. Hwëna desa Yesusu de taïbliBlan srëm hap kirekam gweibirida kinika. Em hwëna ema laïbliBlak. Zep kire hap bahem tangan ëbola-bola gwen. Diki em anakan emaka ëairi gwe'an, "Ëe babë hen zëno mae mo kim taïbliBla srëm gwen." ²¹ Sap Alap insa nonol hli-hlina Zënaka de taïbliBlan srëm hap blom gulsuku, ki Zen hen sa etan emsa blom tasibiri- em de hen zëno mae mo kim taïbliBlan srëmkamye. Molya em emsa kwasang gwibiridaka.

²² Zep man dam gwesin: Alap Zen man zi hip kwasangna hen jala gol gwizimnira. Men zen zëno ora ëse zertreizimdin sin de ang tan hap baes tak, zëbe mae hap mes jala goltreizimki, zep hëndep gweibirida kinika. Hwëna em in zene angkam Kristussu blol ë gwebla'an, Alap zep emsa zëre mo walas makan kwasang gwibirida

gwe'ara. Hwëna em de hen taïbli-blanna insa golzausunkum, emsa hen sa gweibirida kînîla. ²³ Hen kirekam, Yahudi zi de etan taïbli-blann hap lwanda ha'anzak, Alap sa etan eiyas gîl inera. Sap Alap mo sosonna ki- kirekam de etan syal gwibin hip denaye. ²⁴ Sap Alap, eiwa, owas tangankam emsa syal gwibiridaka, zep emsa ik gîn srëm zaitun hli-hli mo kim zëre mo ik gîn zaitun mo hli blom gulsunnuk eiyas gîl ineka. Zep mes tangan dam gwesinîn: Zëre mo ik gîn hli-hlina insa blom gulsuku, desa de etan eiyas gîl inen hap gwa-gwa naka hom. Zëre mo weinak de etan eiyas gîl inen hap maka tangan sam gwesî'in.

Mae hap de ol: Alap tîngare zi ausu nakon zini man kwasang gwibirida gwenda.

²⁵ Yahudi srëm aya-wal oso-wal, em de ëboltebolte gwe-gwen srëm hap, ansa emki ësane gwen! Alap mo aha kalangna mensa orep aning gul gwizimki, hwëna abe hap mes desa goltrëblaka, hwëna angkam ëe ama ebe mae hap srip gulsuzim'in: Emsa angkam en de ëKristen gwen hap Alap gubirida'ara. Sap Yahudi zini zen hen angkam en Alap mo kalang gwe gun sun ënol drak-drak gwe-gwe'an. Hwëna Yahudi srëm zini em kime Yesussu de taïbli-blankam kitak tangan sowe he'ak, Alap men ki-en beyana dam gulsuku, zen dekam sa Alap Yahudi zini insa etan kwang guludala. ²⁶ Zen dekam sa Alap tîngare Israel Bak mo ausu nakore zini in ëngaya gwen hap de ora san dep kwang guludahal zala. Sap Alap mo olak man lwak,

“Ëna Yerusalem kon sa ngaya tabin hip de Zini hata zala,

Zen Zen sa Israel Bak mo ausu nakore zini insa etan Alap osan dep golëlwan dahal zala.

²⁷ Hen Ëe dekam asa ëre mo zi niban de ol ziaha-en gunnu insa sul soner-

kimë zëno mae mo karek-karekna tap gulsuzim'ikye.”*

²⁸ Zep angkam Yahudi zini mes Alap gweibiridaka- san de zëre mo jal zini kiye. Hwëna em Yahudi srëm zini em zebe angkam Kristus hup de ol dawemna ulin gwe'an. Hwëna Yahudi zini in nama Alap mo hlil irin nik hen lowe he'an, zep Alap mo zëbe mae hap de kwasangna nama. Sap Zen nama zëre mo ol gu-gunnu insa enlala gwe-gwibi'ira- mensa orep ayan-aza zem Abraham, Isak, hen Yakob maesa gugubirida gwekaye. ²⁹ Sap Alap mensa ëngaya gwen hap zini dam tasibirki, zëbe mae hap de enlalana insa bëjen wet tyasïn. Hen zëre mo zi hip de golzimdinni, Zen bëjen etan al gulzimdin. ³⁰ Zep Yahudi zi niban Yahudi srëm zi niban, em mese Alap mo nwenak ëlirak gwek. Orep Yahudi srëm zini em hen Alap mo jal zi mo kime lowehe gwek. Hwëna Yahudi zini in kim Kristussu de taïbliëlan hap baes tak, zen dekam zep hwëna emsa kwasang gwibiridaka.

³¹ Zep angkam Yahudi zi hwëna eno mae mo weinak Alap mo jal zi kim lowe he'an, sap Alap emsa hwëna kwasang gwibiridaka. Zen kirekam Alap Zën ki eirim ënol drak-drak gwen

* **11:27** 11:27 Yes. 59:20-21; Yer. 31:31-34

hap gubiridaka- dekam de etan kwang guluda halzan hapye. ³² Sap Alap mes ki gubiridaka, “Dikire tingare zi ausuna nonol ënol drak-drak gwe-gwek, ki asa hwëna etan kwasang gwibirida gwer.”

³³ Eiwa, nëno mae mo Alapna sërkam de dawem tanganna!
Zëno enlalana blal tanganna, hen zëno tame gunnu.

Zini nen toton banakan dep?-
zëno klis gunsu de tame gun hupye,
hen zëno nëbe mae hap de syalaye.

³⁴ Zen in zep Alap mo olak man lwak,
“Zini toton banakan dep?-

Bian mo enlalasa de tame tan naye.
Hen Bian Zënaka toton nara dep?- titi tan naye!”

³⁵ “Hen Alap nara zi hon ba maena bohë gulku?-
zep de hwëna Alap etan golblan hapye.”*

³⁶ Sap tingare yang tabinni, ausuna kitak
Alap en honke.

Zen kitak Alap mo sosen en nakon ki lwa
gwenan,
hen tingan Alap zëre mo bose ensa de teip
gulsuk gweblan en hap ki lwa gwenan.

Dikire kitak hëndep denaban boltere da gwek!
In eiwa.

12

*Kristen zi de Alap mo nwenak kirekam lowehe
gwen hap de ol:*

* **11:35** 11:35 Yes. 40:13; Yer. 23:18; 1Taw. 29:14

¹ Zen in zep, aya-wal oso-wal, ëe ama emsa titi tabi'in: Nen nere mae mo timni Alap en hap nen sosok gul gweblan- otweran ninsi de Alap hap de kalsnak lone seblan makan. Sap Alap tweran tangansa de tru ta seblan hap hom dwam gwe'ara. Zen diki neno mae mo timsi dwam gwibi'ira. Nen mese anakan tame uk, "Alap mes zere mo serkam de kwasang-kwasang nakon Yesussu nebe mae hap sosok tazimki," zep nen hen nen nere mae mo timni zebe hap sosok gul gweblan- dekam de zeno bosesa mam gulblun hap, hen dawemsa gol gweblan hap. ² Auhu-kama enlala enkam bap nen lowehe gwen. Hwena Alap dikim neno mae mo enhosa li ta sone gwizimdin hip nen nenaka Zebon onak sosok ta gwibin. Zen dekam esa eliwehe gwersan de zi esena kiye. Dekam esa Alap mo nebe mae hap de dwam gwibir-zimdinni anakan dam ulsuk gwer, "An kirekam de lowe henna, zen tangan Alap zere mo nwenak dakasti'in."

³ Aya-wal oso-wal, Alap man serkam asa kwasang gweblaka, zep asa dam tasiki- Kristus hup de olsa de golzim halada gwen hapye. Zen in zebë emsa kitak titi tabi'in: Sosonna mensa Alap zere mo syal hap nebe mae hap srën-srënkam gol gwizim'ira, dawem enkam nen gwirensin. Bap nen nenaka anakan boltere ta gwibin, "Abon Alap onakore sosonna mamna." Diki anakare enlala betek naban nen nenaka enlala gwibirida gwen, "Ba hap tangan Alap kirekam de sosonna abe hap golblaka?- sap ee an hen orep karek gol gwen nakake." Zep men kirekam ena aha-en aha-enkam Alapsa anakan laibli

gwebla'an, "Abe hap kire sosonsa golblaka," zen kire enkam emki syal gwe-gwibin- hwëna enaka de boltere ta gwibin srëmkam. ⁴⁻⁵ Zep nen Kristussu de taïbliBlan wenyä, nen mese Deban ëraha-en gwek- san de aha-ere timni kiye. Zi mo timni zëno hli-hlina beyana, hen hlina in mo syala srën-srënna- men ki tanana, tahana, hen ing ala maena. Zep nen hen beyana, hen zëre mo syal hap de sosonna mensa Kristus nëbe mae hap wei yul sonezimki srën-srënna. Hwëna nen an aha-ere tim nikorena, zen in zebe nënaka mas eibirida gwenan hen kwasang eibirida gwenan.

⁶ Zep Alap mes nëbe mae hap zëre mo sërkam de kwasang-kwasang nakon srën-srënkam sosonna golzimki. Zep ebe mae hap de zëre mo Enho nakore hamal hap de olsa ayang gul gwizimdin hip denaka gol gwizimdinkim, men kire enkam ena anakan taïbliBla'ara, "An Bian desa de ayang gulzimdin hip abe hap golblala," ki emki hëndep ayang gulzimdin. ⁷ Hen kirekam, ebe mae hap de aha zisi dikim mas gwibirida gwen hap de sosonsa gol gwizimdinkim, emki hëndep mas gwibirida gwen. Ahaksa aha zisi de Alap mo olkam tawa ta gwibin hip de sosonsa de gol gwizimdinkim, ki emki hëndep tawa ta gwibin. ⁸ Hen aha zisi dikim tatete ta gwibin hip denaka de gol gwizimdinkim, emki tatete ta gwibin. Tahalha zisi de te-alakam mas gwibirida gwen hap denaka de gol gwizimdinkim, emki isrip-sri naban mas gwibirida gwen. Hen Kristen zisi dikim nol gwibiridan hap de sosonsa de ebe mae hap gol gwizimdinkim, emki syal-syalkam nol gwibirida gwen. Hen aha zisi

de kwasang gwibirida gwen hap denaka de gol gwizimdinkim, emki isrip-sri enlala naban kwasang gwibirida gwen.

⁹ Botonkam bahem aha zisi kwasang gwibirida gwen. Diki eiwa-eiwa tangankam em kwasang gwibirida gwen. Enlala jal-jalsa emki ja-ja ta gwen. Dawemsa de syal gwibin hip de enlalasa emki kyang-kyang tasik gwen. ¹⁰ Ere mo Kristen bose walya emki dawemkam kwasang gwibirida gwen- men kiye, ere mo iye tangansa de kwasang gwibiridanna. Eno bosesa de aha zi teip gulsublun hap bahem ödwam gwe-gwen. Hwëna diki hwë-hwëkam em enaka blikip gwe-sibirida gwen. ¹¹ Eno mae mo enho nakon Alap hap de isrip-srina bap zen betek gwen. Hwëna Alap mo Enho nakore isrip-sri naban emki Bian hap de syalak ësyal-syal gwe-gwen. ¹² Isrip-sri naban emki anakare enlala naban lowehe gwen, “Mensa Bian nëbe mae hap hamal gulzimki eiwa nen esa ulin.” Zep kareksa de goltowennak, tatem em ëzauk gwen. Alapsa em gu sonebla tine gwen. ¹³ Kristen bose wal uk de ëtahalha gwenna, emki mas gwibirida gwen. Hen eno mae mo tame tabin srëm zi de eno mae mo ënak yaing gwe-gwe zankam, emki isrip-sri naban ere mae mo gola kon lup gulin gwen.

¹⁴ Zi de emsa Kristus mo bose hap karek tabinkim, Alapsa em gu sone gweblan- Zen de zëbe mae hap dawemsa golzimdindin hip. Hwëna Alap de karek tabin hip bahem abe tan. ¹⁵ Em de Kristen bose omka anakan salbiridankam, “Zen isrip-sri naban lowe he'an,” emki hen zëno mae mo isrip-srina insa enhonak eisbin.

Banakare kareksa de goltowen nakon de enlala dowe hanan naka salbiridanna, emki hen zëno mae mo enlala dowe hananna insa ere mae mo enhonak eisbin- em de hen gol towen makan. ¹⁶ Aha-ere enlalakam em lowehe gwen. Bahem anakan ëbolte-bolte gwe-gwen, “Ëe wal bosyanna wakin han apdenak hom.” Hwëna bose srëm zi niban emki apdekam isrip-sri niban golëapde gwe-gwen. Bahem enaka anakan enlala gwibirida gwen, “Ëe an mes tanganë tewesik.”

¹⁷ Zi de ebe mae hap kareksa golzimdinkim, em hwëna bahem zëbe mae hap karekna gol gwizimdin. Em hwëna tîngare zi mo nwenak dikim dam-dam enkam lowehe gwen hap em ëalp gwe-gwen. ¹⁸ Diki dawemna ere mae mo sosen jam en em ëalp gwe-gwen- dekam de tîngare aha zi niban enlala sësek enkam lowehe gwen hapye. ¹⁹ Hen aya-wal oso-wal, bahem tangan aha zi niban enaka hwë-hwëkam karek ta gwibin. Diki Alap Zën sa karek ta gwibiri. Em bahem. Sap Alap mo olak man lwak,

“Ëe ama emsa gu-gubirida'an: Emsa de zi bose uk karek tabinni, Ëe asa hwëna desa karek ta gwibir. Em bahem.”*

²⁰ Zep men kirekam Alap mo aha olak lwa'an, kirekam em gweibirida gwen,

“Eno jal zi de usak gwenna, tembanesa em golblan.

Hen ho-hole gwenkam, hosa em golblan.

* **12:19** 12:19 Ul. 32:35

Sap em de kirekam gwë gweblankam, dekam saherak esa drënera.”*

²¹ Dowal mo kigi naban de zereijannak, bahem ësin gwe hana gwen. Hwëna dawemsa de gol gwen ennak em tatem ëzauk gwen. Zen dekam sa karek san dep de titi tan hap emsa topse gweblala.

13

Kristen zi de kirekam pemerinta mo nwenak lowehe gwen hap de ol:

¹ Pemerinta nakon men zen nësa irik nil gwenan, desa tingan nen blikip gwesibirida gwen. Sap tingare auhu-kamanak de teipsin-teipsin wenya, zen Alap dam tasik gwibirida. Zen de dam tasibin srëmkam, hom ëteipsik gwenan.

² Zen in zep, pemerinta mo titi tabin olsa de gulmurunkum, zen man nwe-mase gwe'an- Alap mo olsa de gulmurunnu kiye. Alap Zën sa hen nësa kire hap karek ta gwibiri.

³ Men zen dawemna syal nei gwibirin, zen hom pemerinta mo mam-mamna naïribirida gwenan. Diki men zen karekna syal nei gwibirin, zen man naïribirida gwenan. Zep em de dawem ensa syal gwe-gwibinkim, emsa sa sam neisik gweblal, hen airin srëmkam esa gwë gwer.

⁴ Sap pemerintanak de mam-mam wenya, zen desa mes Alap nëbe mae hap de dawem hap dam tasibirki. Hwëna nen de zëno mae mo nwenak kareksa syal gwe-gwibinkim, ki nen airin niban esa lowehe gwer. Ki hwëna Alap sa desa nësa

* **12:20** 12:20 Ams. 25:21-22

de karek tabin hip gubiridala. Sap desa mes Alap kire syal hap dam tasibirki. ⁵ Zen in zep, pemerintanak de mam-mam wenya nen blikip gwesibirida gwen. Zen nësa dikim karek tabin srëm en hap hom, hwëna nëna hen nëre mae mo enhonak kirekame Alap mo dwam gwibinni eis gwibi'in.

⁶ Zen in zep, pemerinta hap em pajak hap de te-alana gol gwizimdin. Sap men zen pemerintanak irik nï'in, zen san de Alap hon de ëbabu gwegwen zini kiye, hen zen kitak pajak te-alana in dekon gajina nulin gwenan. ⁷⁻⁸ Zep men kirekam dakasti'in, kire enkam em gol gwizimdin. Emsa de pajak hap de te-alasa de golzimdin hip gubiridankam, emki golzimdin. Hen men zen blikip gwesibirida gwen hap ëdakasti'in, emki desa blikip gwesibirida gwen. Hen te-ala maesa de bohë gunnu, emki etan sul sonenkam gol gwizimdin.

Mae hap de ol: Kristen zini, nen nënaka kwasang gwibirida gwen, sap Yesus mo lwa halzan hap de yaklanak dep angkam man golek de gwe'an.

Angkam kwasang hap denakaë gulk sun blaonzim'in: Zini kim te-ala yawalsa zinik bohë nul gwenan, zen dekam ben jamkam etan nol gwizimnin. Kim su nul sone gwenan, dekam zep gol gweblanna nolzausuk gwenan. Hwëna ëe ama emsa gubirida'an: Zi bosyansa de kwasang gwibirida gwenna desa bëjen golzausun. Sap men zen zi bosyansa kwasang neibirida gwenan, zen dekam tingare Musa mo titi tabin olsa su nul

sone gwenan. ⁹ Sap tîngare Musa mo tîti tabin ola, zëno ausuna zen kwasangnak lwa'an. Sap zi bosyansa de kwasang gweblankam, dekam wal bosyansa de karek ta gwen srëm hap de tîti tabin ola insa bëjen gulmurun. Zep kwasang gweblankam bëjen kahalo tan hen sowë tan. Kwasang gweblankam hen bëjen zëno bi gwibin kire-kiresa dwam gwibin, hen bëjen tan. Zep Musa mo jalse gwen ola in, zi bosyansa de karek ta gwen srëm hap dena, zëno ausuna aha-en-men zen hen anakan lwakye,

“Zi bose omka em kwasang gwibirida gwen-san de enaka de kwasang gweblanna kiye.”*

¹⁰ Zep nen de aha zisi kwasang gwibirida gwenkam, nen dekam bëjen desa karek tabin. Zep dekam man nwe-mase gwe-gwenan, nen hen kwasangsa de syal gwibinkim tîngare Musa mo tîti tabin olsae kim su kul sone gwenan.

¹¹ Kirekam de lowe henna zen hen mae hap: Sap Bian mo lwa halzan hap de yaklana angkam man tangan golek de gwe'an. Zep ni truwen makan bap nen lowehe gwen. Sap nësa dikim hëndep denaban ngaya tabin hip de yaklanak angkam mes tangan golek de gwer. Men kime Biansa laïblïblak, dekam nama langanak. ¹² Sap kawesinnï an zen angkam lwa'an, tap gwen hap man golek de gwe'an. Hwëna nen dikim ngatan tangannak lowehen hap de yaklana angkam man zïlsi'in zala. Zep kawesinnïk bap nen lowehe gwen. Kawesinnïk de lowehe gwen zi mo syala bap nen gol gwen. Diki ngatannak de lowehe

* **13:9** 13:9 Kel. 20:13-15; 20:17; Ul. 5:17-19; 5:21; Im. 19:18

gwen zi mo syal ensa nen gol gwen- dowal mo kigisa dikim zereija gwen hapye. ¹³ Zep nen Kristus mo nwenak dam-dam enkam nen lowehe gwen- dekam de kitak nesa anakan tame tabin hip, "Zen eiwa ngatannak lowehe gwenan." Syan-syan enlala enkam bap nen lowehe gwen. Hen ho mamakna bap nen mamkam otdeblanda gwen. Bap nen ekahalo gwe-gwen. Hen nere mae mo hole-hle san bap nen ang ta gwen. Hen bap nen edarak gwe-gwen. Hen aha zi de banakare dawem maesa gul irinnik hla tankam, bap nen kire hap husus gwibirida gwen. ¹⁴ Diki Bian Kristus Yesus en hon nen nenaka sosok ta gwibin- Zen dekakim enho nakon nesa golelowehe gweka. Hen bap nen enho nakon ekalang gwe-gwen- dekam de nere mae mo auhu-kama hole-hle san ang ta gwen hapye.

14

Mae hap de ol: Kristen zini neno mae mo taiblibin hip dena man engka en srën-srën në'an, zep kire nakon bahem enaka husus gwibirida gwen.

¹ Ere mae mo Kristen bosena men zen nama Kristussu de taibliblannak etatete gwe srëm gwe'an, depan mae sap esa olësiri gwe-gwer. Hwëna bahem enaka anakare hap klis gul gwen hen husus gwibirida gwen, "Zen ba hap nama epba titi tabin ola in san ang ta gwe'an?" Ahaksa, "Zen ba hap ang ta srëm gwe-gwe'an?" ² Zep anakarekam lwa gwenan: Biansa de taibliblannak men zen etatete gwek, zen tingare tembanena man dwin gwibirin. Hwëna

men zen étatete gwe srëm gwe'an, zen bëjen tweran ninkim dena twinbin. Zen mae hap dwinbir srëm gwe-gwe'an: Sap zëre mae mo enhona man anakan jalse neibirida gwenan, "Em de twinbinkim, em esa Alap mo nwenak karek gwera." * ³ Zep em men zene tïngare tembanena olgwen gwibirin, em bahem, men zen dwinbir srëm gwe-gwenan, desa husus gwibirida gwen. Hen emsa men desa ere mae mo enhona jalse gwibirida gwenda, em hen bahem tweran nin twin gwibin wenya insa anakan jalse gwibirida gwen, "Em ema tweran nin twinbinkim Alap mo nwenak ëkarek gwe-gwenan." Sap Alap mes desa hen kap gul inki. ⁴ Sap Alap hom emsa gubirida'ara- em de ere mae mo Kristen bose wal mo kareksa klis gul gwizimdin hipye. Zen diki Bian zëre mo dena- anakan de klis gul gwen hap denaye, "Em ema ano nwenak husus gwe'ara," ahaksa, "Em ema sam gwesi'ira." Hen Bian mo sosonna ki- dekam de eno mae mo Kristen bosena insa eiwa de ora san dep golëwet so gwen hap denaye.

⁵ Hen kirekam, ahakon man yaklana naitblinda zahe gwenan, "Bian hap dena, an diki zen tangan." Hwëna ahakon man ëgu

* **14:2** 14:2 Dekam ahakore Kristen zini mae hap tweran ninni dwinbir srëm gwe-gwek: Sap Kristen srëm zini dekam yang tasibin dowal-dowal hap de blom tabir-zimdin otweran nin mosrosa pasarak lirak da gwibik. Zen zep ahakore Kristen zini kire naka de li tabin srëm hap tweran nin twinbinni baes ta gwëk. Hen ahakon, men zen Yahudi zi ausu nakon ëKristen gwëk, zen hom Yahudi mo golsriwen tweran ninni dwin gwibik- men ki gwe ninni.

gwenan, “Kitak de yaklana, zen Bian en hap dena.” Zen diki srën-srënkam emki ere mae mo dam gulsun sun ang ta gwen. ⁶ Men zen yaklasa näit gweblanan, zen hen Biansa dikim blikip gwesiblin hap kirekam syal ta gwenan. Men zen hen näitbli srëm gwe-gwenan, zen hen Biansa kirekam blikip neisik gweblanan. Hen men zen tweran ninni dwin gwibirin, zen hen dekam Biansa blikip neisik gweblanan, sap zen tembanena in hap Bian hap dawemsa nol gweblanan. Hen men zen tweran ninni dwinbir srëm gwe-gwenan, zen hen Biansa dikim blikip gwesiblin hap kirekam ëgwë gwenan. Zep zen hen Bian hap zëre mae mo tembanena in hap dawemna nol gweblanan. ⁷ Zep dare hlikna in, zen Biansa dikim blikip gwesiblin hap kirekam srën-srënkam syal ta gwenan. Zen äiris. Sap nen nën home nëre mae mo auhu-kamanak de lowe henna bi eibi'in- dekam de nën dam gulsun hupye, “Ëe asa holokam gwër,” ahaksa, “Nabakam asa til.” ⁸ Zep nen de holokam lowehen hap dena, zen diki Bian mo tahanak lwa gwenan. Tin hüp dena hen kirekam. Zep nen diki Bian de nësa sam gwesibiridan en hap nen lowehe gwen. ⁹ Sap Kristus kire hap tilki hen tin nikon etan ngaya gweka: Dekam de nësa bi gwibiridan hap- sap nama men zene lowe he'an, hen men zen juwenkam teingir gwe gukke.

¹⁰ Zep em ema ëkarek gwe-gwenan- ere mae mo Kristen bose walsya de anakan jalse gwibirida gwenkamyë, “Em ema kirekam Bian mo nwenak ëkarek gwe-gwenan.” Hen em ba

habe Kristen bose omka husus eibirida gwenan? Emki eenlala gwen: Lamkam de Bian nësa kītak klis gul zunkam, Zen sa nësa anakan takensibirida gwera, “Em ba habe kirekam enaka karek la gwibik?” ¹¹ Sap Alap mo olak anakan lwak, “Ēe, Ngaya Zini Alap, ama emsa gubirida'an: Eiwa, tingare zini boklesa sa ap kom da gweblal, hen anakan sa Asa nen gweblal, ‘Em in, eiwa, Alap.’ ”*

¹² Zen in zep, Zen diki Alap Zën sa nësa nëre mae mo auhu-kamanak de gwën hap takensibiridala, hen Zen diki Zen sa nëno mae mo karek-karekna anakan nëp klis gulzimdi, “Em kirekame karek gweka.”

Mae hap de ol: Bahem ere mae mo Kristen bose walya karek san dep de titi tan makan gweibirida gwen.

¹³ Sap nësa Bian kirekam sa klis gulu, zep nen bap nen nënaka anakan klis gul gwen, “Em ema kirekam ekarek gwe-gwenan.” Diki anakan nen nënaka alp gwibirida gwen, “Ēe babë ère mo Kristen bosena karek san dep de titi tan makan gwëblan. Ki zen sa tol kareknak zara.” ¹⁴ Ansaë an kon ebe mae hap ayang gulzim'in, desa Bian Yesus Zën abe hap golblaka: Tembanena hom tangan- dekam de Bian mo nwenak ekun gwen hap denaye. Hwëna zi de anakan eisbinni, “Ēe asa tembanena an kon Bian mo nwenak kun gwer,” ki zen bap zen twinbin. Hen Kristen bose zem bap zen twinbin hip titi tan. Sap zëbe hap eiwa man nwe-mase gwe'an- golsriwen

* **14:11** 14:11 Yes. 45:23

tembane. ¹⁵ Sap em de Kristen bose uk mo nwenak zëno golsriwen tembanesa twinbinkim, zen dekam sa zëre mo enhonak anakan eisbiri, “Abe hap sap kire tembanesa de twinbinni karek, hwëna anik ki akasibik.” Hwëna zëno enhona sa hyanak dowebla hanala. Zep em de zëno nwenak kiresa twinbinkim, em ema karek san dep de titi tan makan gwëbla'ara, hen ki home kwasang gwebla'ara. Sap Kristus zëbe hap hen tilki. Zep bahem zëno enho nik dikim dowebla hanan hap titi tan makan gwëblanzëno nwenak de twinbinkimye. Zen mana tol syauk sun de ora san ang gwenanka. ¹⁶ Zëno nwe srëmnak sap esa. Sap em mese tame gulku, “Kiresa de twinbinkim ëe homë karek gwe'an.” Sap zini in Alap mo dwam gwibinsi srën tame gu'ura, zep bahem zëno nwenak twinbin. Ki hwëna em insa Alap mo dwam gwibinni srën tame gulku, dekon sa hwëna emsa anakan enlala gweblala, “Zen man kirekam karek gwe'ara.” ¹⁷ Sap tembanena hen ba maesa de otdebin hip dena, zen Alap mo nwenak bol-zaun nuka hom. Diki nen men zene Alap mo irik ginnik lowehe gwe'an, an diki zen nëbe mae hap bol-zaun tangan wenyaye: Zëre mo Enho nakore isrip-sri naban nen nëre mae mo Kristen bose walya ban aha-ere enlalakam Alap mo dwam gwibin en san lowehe gwen. ¹⁸ Tingan men zene kirekam Kristussu ang ë gweblanan, Alap man nësa sam gwesibirida gwe'ara, hen zi bosyanna sa hen nësa sam neisibirida gwer.

¹⁹ Zen in zep, Kristen zini nen nen ëalp gwe-gwen- dekam de aha-ere enlalakam lowehe

gwen hap, ekakim nēnaka Kristus en hon dikim tatem ēzauk zahen hap dena kim tīti la gwibik. ²⁰ Zep em bahem Alap mo zi syal gwibinsi karek ta gwibin- zēno mae mo nwenak de zēno mae mo golsriwen tembanesa twinbinkimye. Sap eiwa tīngare tembanena Alap hom golsriwe'ara. Hwēna em de Kristen bose uk mo nwenak twinbinkim, hen zen de emsa de hla tankam ein mas gwenkam, ki em mese desa kareknak drē nenda. Zep em hen dekam mese karek gwenda-kirekam de gwēblankamye. ²¹ Zep tweran ninsi bahem kire nik mo nwenak twenblanda gwen. Anggur hona hen bahem desa de otdeblanda gwen srēm zi mo nwenak otdeblanda gwen. Hen ahakore nik mo golsriwen syalsa zēno mae mo nwenak bahem mae gol gwen. Ki hwēna desa esa kim karek san dep de tīti tabin makan eibirida gwer. ²² Zep men kirekame Biansa tembane mae hap dena laīblībla'an, zen diki ere mae en mo enhonak em lone gwen- Alap en de emsa tawa gwibirida gwen hap. Zep men zene anakan eis gwibirin, “Ēe kirekam de gwēnkam, kareksa homē go'an,” em isrip-sri gwibinnike lowehe gwe'an. ²³ Hwēna zi de enlala nik anakan beya gwenkam, “San ha ēe twinbin? San ha babē?”- kire zini bap zen twinbin. Sap zen de twinbinkim, ki zen sa Alap mo nwenak karek gwera, sap zen hom anakan taībli'ara, “Ēe de desa twinbinkim, ēe homē dekam karek gwe'an.”

Zep em de ba maesa anakare enlala naban syal gwibinni, “Alap hom dekam asa sam gwesībli'ara,” ki em eiwa zēre mo nwenak mese

karek gwenda. Sap em home ere mo syala insa anakan taibli'ira, "Alap man kire syala sam gwesibi'ira."*

15

Men zen Kristussu de taibli'annak etatete gwe srēm gwe'an, desa de kirekam mas gwibirida gwen hap de ol.

¹⁻² Nen men zene Kristussu de taibli'annak etatete gwek, nen bap nen nē-en de nēnaka sam gwesibirida gwen hap syal ta gwen. Hwēna men zen etatete gwen srēm nakon anakan nama neis gwibi'in, "Tembanena an sanē twinbin? San babē?"- zen de hen nēsa sam gwesibirida gwen hap nen hen syal ta gwen. Hen nen mas gwibirida gwen- zen dikim hen Bian Yesussu de taibli'annak tatem ēzauk zahen hapye. ³ Sap Kristus Zen hom zē-en dikim sam gwesin hip syal gweka- men kirekam zēbe hap dena Alap mo olak lwakke, Zen kim Alapsa anakan gublukaye,

"Alap, zini men kim Emsa lamang da gwek, Ēe hwēna dekam ama eisbik- san de Asa de lamang tanna kiye."*

⁴ Tingan men zen kirekam Alap mo ēpba olak ale nul gwek, zen nēsa dikim tawa ta gwibin hip, hen enlala tatetesa dikim nēbe mae hap zer gwizimdin hip. Nen dekam anakare enlala naban esa tatem ēzauk gwer, "Nen an Alap mo taha terenake lowehe gwe'an, hen Zen sa zēre mo ol gu-gunsu nēbe mae hap kitak sul

* **14:23** 14:23 Yak. 4:17 * **15:3** 15:3 Mzm. 69:8-10

sonezimdi.”⁵⁻⁶ Sap Zen Alap Zën kirekam de enlala tatetena zer gwizimnira, nen zebe enlalana ödowe hana srëm gwe-gwenan. Dikire Alap ebe mae hap aha-ere enlalakam dikim lowehen hap dena etan mas gul gwizimk- apdekam ekakim aha-ere enlalakam Bian Kristus Yesus mo Bian Alapsa boltere la gwek, men kirekam Kristus Yesus nësa dwam gwibirida'arake.

Mae hap de ol: Yesus Zen Yahudi zi en hap hom hata zaka, zep bap nen kire hap nënaka klis gul gwen.

⁷Zen in zep, aya-wal oso-wal, Kristus hom nësa anakan klis gulku, “An Yahudi zi. An Yahudi srëm zi.” Zep nen hen bap nen nënaka kire hap klis gul gwen. Hwëna Alap mo bose dikim teipsin hip nen nënaka anakan enlala gwibirida gwen, “Zen ano Kristen bose.”⁸ Emki ëenlala gwen: Kristus Yahudi zisi de babu gwibiridan makan hata zaka- Alap mo ngaya tabin hip de kalangna mensa auyan-aza zemka gu-gubirida gwekake, desa dikim sul sonezimdin hip. Zen dekon zep tangan dam gwesinin, “Alap eiwa taibliblan tanganna.”⁹ Hwëna Kristus hen Yahudi srëm zi hip hata zaka- zen dikim hen Alap zëre mo kwasang-kwasang nakon Zënaka boltere ta gwen hap. Sap Alap mo olak Kristus mes hamal hap Alapsa anakan gubluka, “Ëe asa Yahudi srëm zi niban eno bosena ziteip gulsuk gweblal, hen tërya ban asa eno bosena ziboltere gul gweblal.”*

* 15:9 15:9 2Sam. 22:50; Mzm. 18:50

10 Hen Musa Alap mo olak kire hap hen ale gulku,
 “Yahudi srëm zi, em Alap mo nonol hlil irin zi
 niban em apdekam Alapsa isrip-sri gwe-
 gweblan.”*

11 Etan ahana Yahudi srëm zi hip dena buku
 Mazmuruk anakan ale nuk,
 “Tingare zi ausuna Alapsa em isrip-sri gwe-
 gweblan.

Hen tingare okamanak de zini Desa en boltere
 la gwek.”*

12 Hen Yesaya Bak Alap mo ola anakan ale gulku,
 “Daud Bak mo weinak de irik gin hip de Zini men
 Zen de hata'an zaka,
 Zen Zen sa hen Yahudi srëm zi ausuna irik gili.
 Hen zen Desa en sa engaya gwen hap blol në
 gweblal.” *

13 Zen in zep, sap em hen mese Bian Yesussu
 laibliblak, Ee in zebë Alapsa ebe mae hap
 abe ta gwenan- Zen de isrip-sri enlalasa ebe
 mae hap mamkam ing ta sone gwizimdin hip,
 anakare enlala naban, “Nen an eiwa Alap mo
 taha terenake lowehe gwenan.” Dekam Alap mo
 Enhona sa emsa golëlowe gwera, hen dekam esa
 anakan de tame gunnu esek ulse gwer, “Alap
 mensa nësa gu-gubiridaka, nen eiwa esa ulin.”

*Mae hap de ol: Paulus kire hap Romak de
 Kristen zi hip udobe naban ale gul sonezimki.*

* 15:10 15:10 Ul. 32:43 * 15:11 15:11 Mzm. 117:1 * 15:12
 15:12 Yunani olkam, Paulus man anakan Yesaya mo ola insa ale
 gulku, “Isai Bak mo ausu nakon sa hata'an zaka...” Isai, zen
 teipsin zini Daud Bak mo Bian. (Yes. 11:10)

¹⁴ Zep aya-wal oso-wal, ëe anakare enlala nabanë suratna ansa ebe mae hap ale gul sonezimk, “Romak de Kristen zini in dawem-dawem tanganna. Zen hen dawemsa aha zi hip hen-henkam noltrei gwizimnin. Zen hen mes Alap mo dwam gwibinni tame nuk, hen dekam aha zisi desan dep titi da gwibirin.” ¹⁵ Sap ëe mesë kirekam emsa taiblibiridak, in zebë anakan enlala gwek, “Ee anik etan udobe naban suratkam enlala sobiridak, sap Alap mes ki zëre mo kwasang-kwasang nakon syala ansa abe hap wei yul soneblaka.” ¹⁶ Sap Zen eiwa mes asa dam tasiki- Kristus hup de ol dawemsa de Yahudi srëm zi mo lang-lang san golzim halada gwen hapye. Zen kim Kristussu daibli gwebla'an, Alap dekam zep zëre mo Enhokam ngan tasik gwibi'ira. Yahudi srëm zini in dekam zep zëre mae mo timni Alap en hap sosok nul gwebla'an-otweran ninsi de Alap hap de kalsnak lone seblan makanye. Alap man tangan dekam sam gwesibirida gwe'ara. Ano syala zep nwe-mase gwe'an- san de Alap mo golak de syal gwegwen zi de otweransa tru tase gweblanna kiye. Hwëna ano syala otweran tangan hap hom. Zen hwëna dekam zini zëre mae mo timni Alap hap sosok nul gwebla'an. ¹⁷ Zep zen in zebë Alap mo nganak de ëre mo syala insa Kristus onakon sam gwesik gwibi'in ¹⁸ hen boltere gul gwe'an. Sap zen ano syalsa hom. Zen Kristus ap wei yul soneblaka- Yahudi srëm zini emsa dikim Alap osan dep zon guluda gwen hap, sap ano ola kon de Biansa taibliblankam, hen ano banakare syal mae nakon de taibliblankam.

¹⁹ Sap Alap mo Enhona man abe hap sosonna gol gweblanda, zen in zebë Yahudi srëm zi mo ngirinnik sërkam de owas-owasna syal gwe-gwibirin- dekam de zen hen Kristussu taïbli gweblan hapye. Kirekam de sosonna in, dekam zebë Yesus hup de ol dawemna insa ë-ë san sowe henkam anakan gol halada gwek, “Zen Zen- nësa de ngaya tabin hip de Teipsin Zi niye.” Nonol tanganna Yerusalem konë kon gwesik hanak, hëndep langna Ilirikumk golhatak. ²⁰ Sap ëe ama anakan dwam gwe-gwenan: Men zëwe Kristus mo bosena nasalbir srëm gwe'an, desan de tawa tabirida gwen hap. Sap ëe ama baes gwek- aha mo nga syal gweblannak de otanesa eiyas gïn hïpye. ²¹ Zep ano kirekam de syala in, zen man dakastï'in- Alap mo olak men kirekam ale nukye,

“Zini men zen Alap mo zer sonen Zi hip de ola nulin srëm gwe'an, zen sa nulin gwer. Hen men zen ësane gwe srëm gwe'an, zen sa ësane gwenkam hëndep tame nul.”*

Paulus mo Romak de Kristen zisi de amjanbin hip de kalang ol:

²² Kirekam de langa san golzim halada gwen srëmkam, ki amaka Romak de zini emsa nabakam amjanbik. Hwëna ama hir-hir gwek.

²³ Hwëna angkam mesë an san de langna beyakam amjanbinkim sul soner. In zebë hwëna ebon mae osan dep isrip-sri naban kalang gwe'an, sap orep mesë emsa de amjanbin hip kalang gwe-gwek. ²⁴ Sap ëe angkam Espanyol

* **15:21** 15:21 Yes. 52:15

san debë hen kalang gwe'an. Zen dekam asa hen emsa amjanbir kinzil. Dekam asa isrip-sri naban apdenak emsa golëlowehe inendal. Dekon em neik hwëna asa Espanyol san dep de song gwennak mas ëblak. ²⁵ Hwëna angkam nonol Yerusalem san debë song gwe'an- zëwe de Kristen zi tahalha hap de te-alasa zerzimhan hap. ²⁶ Sap Makedoniak de Kristen zini hen Akayak de wenya zen mes zëre mae mo kwasang-kwasang nakon te-alana tagam dak- Yerusalemk de Kristen zi tahalhasa dikim mas gwibiridan hapye. ²⁷ Zen zëre mae mo enlala enkam ki Yerusalemk de Kristen bose zemka de te-alakam mas gwibiridan hap ola aha-en nuk. Sap kirekam man tangan zëbe mae hap sam gwesizim'in. Sap Yerusalemk de zini mes nonol zëbe mae hap hëndep dikim lowehe gwen hap de te-alana nër sonezimk. Zep man tangan sam gwesinän- Yahudi srëm zi de okama ennak dep de te-ala enkam mas gwibirida gwenkamye. ²⁸ Zep ëe kimë syala ansa sul sonesi'ik, te-alana insa de zerzim hankam, zen dekam asa Espanyol san dep emsa amjanbir kinzil. ²⁹ Hen ëe ama Kristussu blol gwebla'an, ëe de ebon mae onak hata zankam, Zen sa abe hap hë'ho gwibin nika golblala- desa de hwëna ebe mae hap kae gwibir-zimdin hip.

³⁰ Aya-wal oso-wal, nen angkam mese apdekam Bian Yesussu eirink, hen Alap man zëre mo Enhona nen dikim nënaka hwë-hwëkam kwasang gwibirida gwen hap dena ing ta sone gwizimnira, zen in zep emki hen abe hap enlala zon tasiblin naban Alapsa abe

ta gwen. ³¹ Mae hap em Alapsa abe ta gwen: Yahudi mo langnak de Bian Yesussu taïbliplan srëm zi mo taha nakon deka asa hil ti sone gweka, hen dekakim zëwe de Kristen zini in ano syala ansa isrip-sri naban nulink. ³² Kirekam de Alap mo dwam gwibin sin lwankam, ëe isrip-sri enlala naban asa ebon mae onak hatazal, hen eban mae de lowe henkam ëe asa tangan sam gwesil.

³³ Alap men Zen zëre mo tahana nëbe mae hap deisu guzim'ira, dikire Zen emsa kitak kara ta gwibik. In eiwa tangan!

16

Paulus mo dawem gol sonen ol:

¹ An kon an, em dikim nëre mae mo somola Pebe Baksa tame gun hubë ale gulzim'in: Zen Kengkreyak de jematnak de zi mo tahasa trï so gwizimnin. Zep emki desa dawemkam gul irin, ² sap em mese apdenak deban mae Bian Yesus hun ëraha-en gwek. Emki zëno tahalhasa sul sonebin, sap zen hen mes Kristen zini beyakam mas gwibirida gwek. Asa hen ki mas gwe-
gweblak.

³ Ano dawem gol sonen ola ansa ëre mo wal bose darena Priskila ne Akwila nikip ayang ulzimk. Zen aban mae apdekam Kristus mo nganak syal ta gwenan. * ⁴ Hen Kristus hup de jal hap kim sap asa da'ak, zen zen hwëna asa de ërzaunnuk lïn hip alp eisik. Hen zen dekam

* **16:3** 16:3 Priskila, zen we bose. Akwila, zen zi zem. (Kis 18:2-3; 18:18; 18:26)

asa en hom kirekam mas ëblak, hwëna tîngare Kristen zisi mas eibiridak. Sap asa de ngaya la srëm gwenanam, ki ahakon molya ëKristen gwe'anam. Zen zep Yahudi srëm zini men zen abon onakon ëngaya gwen hap de ol dawemna nulin gwenan, zen hen zëbe nikip dawemsa nolzim'in. ⁵ Hen ano dawem gol sonezimdinni emki hen gubiridan- jematna men zen zëno nik mo golak tagal gwe-gwenanke, zëbe mae hap.

Hen ano dang tîninak de wal bosena Epene-tus Baksa enblak, "Paulus dawem ensa ep gol soneblaka." Sap Asia mo lang nakon, zen zen nonol Kristussu taïbli-blaka. ⁶ Hen kirekam Maria Baksa enbik, "Zen dawem ensa ep gol sonebirki." Zen ebe mae hap de dawem hap mes syala dohon-hon naka gol gwëk. ⁷ Hen Andronikus ne Yunia neka enzimk, "Zen dawem ensa ebe nikip gol sonezimki." Zen ano Yahudi bose, hen zen apdekam asa bwinak ërgwë gwëk. Zen Kristus mo dam sosun we-zi dare, hen ahakore dam tasibin wenya man sam neisik gwizimnin. Hen zen zen nonol abon onakon Kristussu laïbli-blak. Ëe hwëna zëno nik mo lure nakonë taïbli-blak. ⁸ Ano dang tîninak de wal bosena Ampliatussu hen enblak, "Paulus dawem ensa ep gol soneblaka." Sap ëe deban mesë apdenak Bian han ëraha-en gwëk. ⁹ Urbanu'u hen enblak, "Paulus dawem ensa ep gol soneblaka." Sap ëe deban mae apdenak Kristus mo nganak syal ta gwenan. Ano dang tîninak de wal bosena Stakis Baksa hen kirekam enblak. ¹⁰ Hen kirekam Apeles Bak hap ano dawem ola ayang ulblik. Sap desa kim Kristus hup de jal

hap karek dak, zen hom dekam Kristussu hli taka. Zen hëndep angkam nama tatem zau'ura. Hen Aristobulus Swe hon de syal ta gwen zini enbiridak, "Paulus dawem ensa ebe mae hap gol sonezimki." † ¹¹ Ano Yahudi bosena Herodion Baksa hen enblak, "Zen dawem ensa ebe hap gol soneblaka." Hen Narkisus Swe hon de syal ta gwen Kristen aya-wal oso-walya enbiridak, "Zen dawem ensa ebe mae hap gol sonezimki." ¹² Hen ano dawem gol sonen ola we darena Tripena ne Triposa neka enzimk, men zen hen Kristus hup de syal dohon-honna ol gwenanke. Hen ano dang tininak de somola Persis Baksa hen kirekam enbik, sap zen hen kirekam de syal dohon-honsa gol gwek. ¹³ Hen ano dawem gol sonenna Rufus neka an zeban enzimk. Kristus man tangan sam gweka- Zen kim desa zère mo syalsa de gol gwen hap dam tasikiye. Hen an zem insa, èe ama tangan gweibik- san de ano ane tanganna kiye. ¹⁴ Hen ano dawem ol gol sonenna enbiridak- Asinkritus, Plegon, Hermes, Patrobas, hen Hermas Baksa, hen tingare aya-wal oso-walya men zen deban mae lowehe gwenan. Desa kitak enbiridak. ¹⁵ Hen ano dawem

† **16:10** 16:10 "Aristobulus Swe hon de syal ta gwen zi" hip dena awe, Paulus man Yunani olkam anakan ale gulku, "Aristobulus hon de wenyä." Dekam man nwe-mase gwe'an, Paulus Aristobulus zère hap hom dawemna gol soneblaka. San ha zen dekam mes yap tilki- men kirekam hen orep tangan de Kristen zini ale nulblikke, hen san ha dekam Kristenkam de babu zem man yap tinkim hli yuludaka? Ahaksa, san ha zèno golak de lowehe gwen wenyä kip gol sonezimki?- men zen en èKristen gwekke. Ayat 11nak Narkisus Bak hap dena hen kirekam lwa'an.

ol gol sonenna enbiridak- Pilologus Baksa, Yulia, Nereus, hen zëno somola, hen Olimpás Baksa, hen tingare Kristen gwen wenyá men zen deban mae lowehe gwenan. Desa hen kitak anakan enbiridak, "Paulus ebe mae hap dawem ensa gol sonezimki." ¹⁶ Men kirekam Kristen zini étagal gwennak égwë gwenan, ansa de baca gulsun hyanak emki kwasang naban enaka tahasa golétowaran. Tingare awe de aya-wal oso-walya zen dawem ensa ebe mae hap nol sonezimk.

Aumwa hap de ol zim-zim:

¹⁷ Aya-wal oso-wal, ëe etan aumwa hap ol zim-zimsi ebe mae hap mas gulzim'in: Men zen ehliwen hap emsa titi da gwibirin, desa bahem salbirida gwen. Sap zëno mae mo tawa tabinni in hom apde në'an- men kirekam nonol emsa tawa da gwibikye. Sap zëno mae mo yasik tabinni in, dekam zep zini Kristussu de taibliblan nakon éaltil gwenan. Zep kirekam de zini langa lasik gwibik. ¹⁸ Sap kirekam de zini, zen nëno mae mo Teipsin Zini Kristus mo syalsa hom no'an. Zen hwëna zëre mae mo dwam-dwam enlalasa dikim sul sonen hap kirekam syal ta gwenan. Zen yasik tabin hip ol dërek-dërekkan ba tame gun srëm wenyaka nolëton gwenan, hëndep desan zep ang ta gwenan. ¹⁹ Hwëna emsa tingare Kristen zini mes anakan tame dabik, "Romak de Kristen zini, zen eiwa tangankam Bian osan ang ta gwe'an." Zep kirekam de emsa sane ta gwibinkim, ëe ama tangan emsa isrip-sri gwibirida gwenan. Èe in zebë emsa titi tabi'in: Enlala blala ban em dawem ensa

gol tine gwen. Hwëna karek gol gwensa em hwalebin. ²⁰ Alap men zen tahana nëbe mae hap deisu guzim'ira, Zen sa nabakam dowal mo kīgisa nëno mae mo tana iltikinnik drëneranen dikim zë zaublu inen hapye. Dikire Bian Yesus onakore kwasang-kwasangna eno mae mo enhonak lwa gwek.

²¹ Kristus mo nganak de syal bosena Timotius hen dawemsa ebe mae hap gol sonezimki. Hen kirekam ano Yahudi bose walya Lukius, Yason, hen Sosipater Bak, zen hen dawem ensa ep nol sonezimk. ²² Ëe, Tertius, men zenë suratna ansa Paulus mo ol san ale guk, dawem ensaë hen ebe mae hap gol sonezim'in, sap ëe an hen eno mae mo Kristen bose. ²³ Gayus Bak hen dawem ensa ebe mae hap gol sonezim'ira. Ëe, Paulus, angkam zëno golakë gwë'an, hen awe de jematna zëno golak tagal gwe-gwenan. Ë yala awe de pemerinta mo te-ala aït gweblan zini Erastus Bak hen dawem ensa ebe mae hap gol sonezimki. Nëno mae mo Kristen bosena Kwartus Bak hen kirekam.

[²⁴ Dikire Bian Kristus Yesus mo kwasang-kwasangna ebon mae onak lwa gwek. In eiwa.]

²⁵ Men kirekamë Kristus hup de ol dawemna gol halada gwenan, nëno mae mo Alapna Zen sa emsa Yesussu de taïbliblannak dikim tatem ëzaun hup tatete ta gwibiri. Orep Alap mo kire hap de kalangna zi hip man aning gul gwizimki.* ²⁶ Hwëna ëe zebë angkam zëno orep de ol aning gunnu insa Yahudi srëm zi sin dep golzim halada gwe'an- men kirekam hëndep de

* **16:25** 16:25 Ef. 1:9-10

gwë gwen Zini Alap Zëna abe hap syala wei yul soneblakake, hen men kirekam orep zëre mo olsa de ayang gul gwen zini hamal hap ëguguk gwekke. Hëndep em Yahudi srëm zi ausuna zebe angkam Kristussu laïbli gwebla'an hen ang ë gwebla'an. ²⁷ Dikire Kristus Yesus onakon Alap mo bosena hëndep denaban teip nulsuk gweblak, sap Alap Zen Zen aha-en tangan- enlala blal Zi niye. Amin.

**Alap mo Ol Ęse, zere mo zi niban de ol
ziaha-en gu hup dena**

**Orya: Alap mo Ol Ęse, zere mo zi niban de ol
ziaha-en gu hup dena (New Testament)**

copyright © 2005, 2018 Wycliffe Bible Translators, Inc.

Language: (Orya)

Contributor: Pioneer Bible Translators

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022

c93f518f-565f-570c-87e7-50d54e5ff0f6